

Universitätsbibliothek Paderborn

Thesavrvs Sacrорvm Ritvvm, Sev Commentaria In Rvbricas Missalis Et Breviarii Romani

In quibus origo cuiusque Ritus, Causæ historicæ, vel mysticæ, ex maiorum ingenio, Theoria, Praxis, Obligatio, & exquisitus Vsus, additis opportunè Decretis omnibus S. Rituum Congregationis, quàm breuissimiè explicantur

Gavanti, Bartolommeo

Antverpiæ, 1646

Sectio Sexta. De Proprio de Tempore.

urn:nbn:de:hbz:466:1-40233

SECTIO SEXTA.

De Proprio de Tempore.



XPO SCIT ordo Breuiarij, ut, explicatis Rubricis generalibus, accedamus ad Rubricas speciales, & partes eiusdem Breuiarij; & cum de Psalterio (quod alias erat in centro Breuiarij, nunc in capite) dixerimus satis, cum de Psalmis enarraremus, Sectione praecedenti cap. 8. reliquum est, ut Proprium de Tempore, quod Psalterium sequitur, examinemus, digniora tantum relaturi.

SECTIONIS SEXTÆ CAPITA XXI.

- | | |
|---|--|
| 1 De Aduentus. | 10 De Feria quarta Cinerum. |
| 2 De Antiphonis maioribus Aduentus. | 11 De Dominicis Quadragesime. |
| 3 De Dominica quarta Aduentus. | 12 De Dominica Passionis. |
| 4 De Vigilia Nativitatis Domini. | 13 De Dominica Palmarum, & Hebdomada maiore. |
| 5 De Natali Domini. | 14 De Paschate, & eiusdem Octaua. |
| 6 De Festis infra Octauam Nativitatis Domini. | 15 De tempore Paschali. |
| 7 De Epiphanie Domini. | 16 De Litanis maioribus, & minorib. |
| 8 De Dominicis post Octauam Epiphanie. | 17 De Festo Ascensionis Domini. |
| 9 De Septuagesima, & Dominicis sequentibus. | 18 De Pentecoste. |
| | 19 De Dominica Trinitatis. |
| | 20 De Festo Corporis Christi. |
| | 21 De Dominicis post Pentecosten. |

De Aduentu. CAP. I.

DE Hymnis & Lectionibus degimus superiori Sectione cap. 6. & 12. omittimus Suffragia Sanctorum, ne ante Christum natum implorare videamur eorum opem, quos ipse Christus suo aduentu sanctitate donauit. Neque sit com-

memoratio Crucis, ne videatur passus antequam natus; neque item de Pace, quæ ante Nativitatem eiusdem non fuit; sed eo nato, ab Angelis data est hominibus bonæ voluntatis, Azot lib. 10. par. 1. cap. 16. Aduentu Principis cedunt alij, ait Duran. lib. 6. cap. 2. quod supra retulimus.

2 Responsorium primum est in
Breuiaria-

Breuiario vnicum, quia tres Versus habet; & Amalar. de Ord. Antiph. c. 8. meminit. Auctor illius fuit Monachus S. Gregorij, ex Duran. lib. 6. c. 3. Tres autem Versus ex eodem Duran. dicuntur nomine trium ordinum Sanctorum, qui ante legem, in lege, post legem Saluatorem exoptarunt: quibus additur *Gloria Patri*, in laudem S. Trinitatis, quæ tandem misit eum in terras. Repetitur dénum à capite Responditorum; quia, vt inquit Gemma lib. 3. cap. 1. iterum aduentus Domini à fidelibus expectatur. Repetitio fit à remotiori, deinde à minus remoto, & dénum à propinquiori: quia Patres primi temporis remotiores fuerunt ab Aduento Christi quam recentiores, Mich. Timot. in Spec. ordinand. tractat. 6. par. 5. cap. 4.

3 Reliquorum Responsiorum dicitur auctor S. Gregorius; & mentio est eorumdem, sed ordine paulum diuerso, apud Amalar. loco citato cetera cum eodem Amalar. concordant, præter Lectiones.

4 In Dominica tertia mutatur Inuitatorium, quod concordat cum Capitulo Vesperarum & Laudum, ad excitandos animos erga Christum venientem; & congruentius nunc mutatur in Dominica tertia quam in Feria 4. Quatuor Temporum, vt ante Pium V. fiebat.

5 S. Hilarius in lib. Officiorum citatus à Bernone de quibusdam ad Missam spec. c. 4. notat, in tribus Dominicis Aduentus significari trinum Christi aduentum ad fulneam infructuam; venit enim ante legem per naturalem hominis intellectum; venit sub lege cum ipsa lege; venit ultimò per gratiam. Hæc ille.

6 De Quatuor Temporibus Ad-

uentus, sicut etiam de alijs in Vere, Æstate & Autumno, satis superque diximus in priore Tomo. Officium est feriale cum Precibus, exceptis Temporibus Pentecostes; & appellatae sunt Feriæ maiores in recognitione Breuiarij, vt diximus Sectione 3. cap. 6. num. 2. pag. 27.

De Antiphonis maioribus Aduentus. CAP II.

1 **A**ntiphonæ maiores in Aduentu dicuntur eæ, quæ per septem dies ante Nativitatem Domini recitantur, incipientes ab O, quæ maiores alijs sunt, quia duplicantur. De his querantur quatuor, &

Primo, Cur ad *Magnificat* recitantur? nam ad Laudes congruentius videbantur recitari posse, ad Canticum Zachariæ, quod fuit cantatum de Aduento Messiae. Respondet tamen Amalar. de Ord. Antiphon. cap. 13. eas spectare magis ad beatam Virginem quam ad Zachariam. Addit Duran. lib. 6. cap. 11. quia Christus expectabatur ad Vesperam mundi, ideo dicuntur in Vespere ad *Magnificat*.

2 Cur duplicantur? ad explicanda iterata suspiria sanctorum Patrum, Duran. loco citato.

3 Cur septem? Ad litteram, vt per Octauam ante Nativitatem Domini accendamus erga Christum venturum, admirantes potius quam vocantes Saluatorem, qui iam venit: nam illud O admirantis est magis quam vecantis, ex Amalar. loco cit. Mysticè quoque septenarius numerus significat in Christo septiformem Spiritus sancti gratiam, & septem humani generis miseras, quas ex Antiphonis

O 3 haustas

haustas recenseret Durand. *loco citato*: quarum causa, inquit, egemus Doctore contra ignorantiam, Redemptore à pœnis æternis, Liberatore à seruitute diaboli, Educatore à consuetudine peccati, Illuminatore tenebrarum nostrarum, Salvatorem ad reducendos exiles in patriam, tum Gentes, vt in sexta Antiphona, tum Iudeos, vt in septima.

4 Quis ordo inter easdem? Amalar. *loco citato* eas enumerat iuxta Antiphonarium Metense, & innuit, ordine diuerso à Romanis recitari. Ordo noster est apud Gemmam an. lib. 3. cap. 5. & ab eodem auctore sic explicatur; vt in prima Antiphona dicatur Christus Sapientia, qui venit in spiritu sapientiae. In secunda, Adonai: quod nomen Moysi indicauit Deus, qui legem dedit, & venit nos redimere per spiritum intellectus. In tertia, Radix Iesse in signum populorum, hoc est, in signum Crucis, & liberare nos venit in spiritu consilij. In quarta, Clavis David, qui cælum iustis aperit, & infernum claudit in spiritu fortitudinis. In quinta, Oriens, qui nos illuminat spiritu scientiae. In sexta, Rex Gentium, & Lapis angularis, qui saluat omnes per spiritum pietatis. In septima, Emmanuel, qui venit non sine spiritu timoris, dans cunctis charismata amoris. Hæc ille fusiùs. Est igitur hic numerus septenarius ex Isaia 11. de sumptus.

5 Praecedunt has Antiphonas aliae ad Laudes, quasi præparatoriae ad maiores, de quibus Amalar. libro 4. cap. 30. vt renouemur, ait, paulò ante Nativitatem. Habebantur de his in Breuiarijs antiquioribus quædam Tabulae Parisienses cum hac Rubrica, vt scilicet, si Festum occurre-

ret, completis omnibus de Festo, rursus dicerentur Laudes cum his Antiphonis & Psalmis ferialibus: quæ Tabulae à Pio V. mutatae sunt in Rubricam commodiorem, qua quinque Feriae complentur; & quæ in die sancti Thomæ occurruunt, in Sabbato collocantur.

6 Tres aliæ Antiphonæ sunt priuilegiatae in his diebus. Prima est *Expectetur*, quæ semper in Sabbato dicenda est quarto loco (quod & antiqui obseruarunt) vt concorderet cum Cantico Sabatino, de quo sumpta est; & benè quadrat Aduentui Domini. Altera est, *Nolite timere*, quæ die 21. mensis Decembris semper est ponenda, siue sit Festum sancti Thomæ, siue Dominica; ne enuntietur falsum extra quintum diem ante Nativitatem. Hæc ante Pium V. dicebatur ter cum *Gloria Patri*, ex instituto Fratrum Minorum, non Romano; & ideo ritus ille fuit abrogatus. Tertia est, *Ecce completa sunt*; quæ ultimo die dicitur ante Vigiliam Nativitatis, ex Tabulis Parisiensibus Radulpho antiquioribus, quas ille citat, & excludit *Propos. 16*. Congruit autem diei, vt ex verbis eiusdem Antiphonæ constat.

7 Cõcessit Hispanis Gregorius XIII. vt anticipent prædictas Antiphonas in die 16. Decembris, quia die 17. celebrant Festum Expectationis patris beatæ Virginis. At quid, quando dies 16. est Dominica? eo anno omittuntur Antiphonæ Feriae 2. ea ratione, qua in vniuersali Ecclesia omittuntur Antiphonæ illius Feriae, in qua occurrit Festum sancti Thomæ, quando Vigilia Nativitatis occurrit in Dominica, cuius Antiphonæ dicuntur in Sabbato.

§ Et

De Domin. IV. Aduent. & Vigilia Natiuit. Dom. III

3 Et quando alicubi contingit reponi has Antiphonas in Feria diuera ab ea cui sunt assignatae, Antiphona 4. ea erit quæ conformis est Cantico recitando, sicuti præscribitur de Antiphona *Expectetur* reseruata Sabato.

De Dominica quarta Aduentus.

C A P. I I I.

Contingit non legi in Officio Dominicæ 4. Euangeliū, quod idè saltem in præcedenti Sabbato legitur: pura, quando in hac Dominicæ occurrit Vigilia Natiuitatis, & eo anno omittuntur Antiphonæ ad Laudes quæ occurrunt in die sancti Thomæ, ut in Sabbato Quatuor Temporum ponantur Antiphonæ Dominicæ quartæ, quæ omitti non debent. quod affirmat Microl. cap. 33. & approbat indagator Romanorum Rituum Radulphus Propos. 16. qui appellat *ibidem* supercrescentia ea quæ habentur in Breuiario post Dominicam 4. quia in breviori tempore Aduentus omittuntur.

2 Et licet in prædicto casu Antiphona quarta Dominicæ omittatur, cuius loco dicitur Antiphona, *Expectetur*; eadem tamen quarto loco resumitur in Vigilia Natiuitatis, ne Officium huius Dominicæ vlo modo pereat.

De Vigilia Natiuitatis Domini.

C A P. I V.

SI Vigilia venerit in Sabbato, vice Psalmi *Iubilate*, in nocturno dicitur Psalmus *Bonum est*; ne ille bis dicatur, ad Matutinum, & Laudes; & neque hic omittatur in Officio.

2 Antiphonæ ad Laudes, *Iudea*, & *Jerusalem*, &c. habentur apud Rupert. lib. 3. cap. 12.

3 Ritus Officij à Laudibus est Duplex, non ante annum 1521. in Breuiari. impressis; at erat etiam in antiquis M. S. Duplex; &c, cum Vigilia sit illius Festi, quod est initium salutis nostræ, iure merito cum exultatione est celebranda. Est igitur Officium partim feriale, quia Vigilia est; partim festiuum, iuxta illud, *Leuate capita vestra*, &c. & ut Officium Primæ sit solemnne, in quo est annuntianda Natiuitas Salvatoris cum solemnni lectione Martyrologij.

4 Legitur Martyrologium cum maiori quam aliâ solemnitate. qua in re quisque abundat in ritu suo. Illud est commune ferè omnibus, ut genua flectamus ad ea verba, *In Bethleem Iudea*, &c. usque ad ea, *secundum carnem*; ea ratione qua ad Missam genuflectimus in Symbolo ad ea, *Et incarnatus est*; & in ultimo Euangelio ad ea, *Et Verbum caro factum est*. Humiliato namque Deo, & nos usque ad terram profundiùs solito humiliari decet. quod & additum est in postrema Martyrologij recognitione.

5 Ad Nonam inclusuè desinit Aduentus, & cessat *Angelus Domini*, &c.

De Natali Domini.

C A P. V.

Lectiones Isaiae hac nocte leguntur sine titulo; ea forte ratione qua Hugo docet lib. 2. cap. 3. Capitula legi sine titulo, quando scitur auctor; & Isaías in toto Aduentu lectus est, ita ut pateat cius nomen. Dicrem cum P. Ruiz, iam

iam non per Prophetas, sed in Filio
Deum loqui.

2 Responsoria videntur vagari; sed
ait Amalar. de Ord. Antiph. cap. 15.
quem sequitur Gemma lib. 3. cap. 9.
esse Xenia, quæ deferuntur partim
Puero nato, partim Deiparae. In primo
verò Responsorio additur *Gloria Pa-*
tri, in gratiarum actionem de tanto
beneficio, Gemma cap. 7.

3 In tertio Nocturno multiplicatur
Alleluia ad Antiphonas; quia, ut alias
diximus, tertium Nocturnum signifi-
cat tempus gratiæ post legem; in quo
significari debet lætitia per Christum
natum nobis communicata, Amalar.
lib. 4. cap. 31.

4 Diuiditur Matutinum à Laudibus,
& inter utrumque cantatur Missa,
ex Microl. cap. 34. & Gemma lib. 3.
cap. 10. lib. 4. cap. 117. qui ritus vide-
tur habuisse ortum post Ordinem Ro-
manum; in quo prima Missa celebra-
tur expletis Vigilijs, id est Nocturnis,
& Matutinis, id est Laudibus (hoc
enim nomine vocabantur Laudes) nisi
dicamus fuisse peculiarem hunc ri-
tum Cappellæ Pontificiæ, quæ eadem
nocte tres Ecclesiæ, S. Mariæ Maioris,
S. Anatalsiæ, & S. Petri visitabat, &
Missa solemnies celebrabat. Quid-
quid sit, cum Laudes pertineant ad
diem potius quam ad noctem, & pri-
ma Missa sit noctis, non diei; congruè
præscriptum est, ut ea cantetur ante
Laudes, & post Hymnum *Te Deum*,
Gemma dicto cap. 117.

5 Laudes sequuntur Missam pri-
mam de æterna generatione, quæ prius
exitit ante omnem creaturam quæ
Deum laudare potuerit, Duran. lib. 6.
cap. 13. & in prima Antiphona quasi
choream ducimus ijs verbis, *Quem*
vidistis pastores, &c. Duran. ibidem.

quam Antiphonam non videtur no-
tuisse Amalarius, qui de Ord. Antiph.
cap. 15. incipit ab ea, *Genuit puerpe-
ra Regem*.

6 Prima summo manè dicta, canta-
tur altera Missa. Antiquiores aliqui
ante Primam immediate post Laudes
cantabant secundam Missam, ex Gem-
ma lib. 3. cap. 11. at S. Antoninus 3. par.
Summ. tit. 13. cap. 6. §. 4. cum Palud. in
4. dist. 13. quest. 2. artic. 2. concl. 2. re-
fert de generali consuetudine, Missam
secundam ante Primam horam Cano-
nicam celebrari solitam; nisi eos expli-
cemus cum Francol. de Temp. Hor.
Can. 1. par. cap. 16. num. 6. non loqui de
ritu Ecclesiastum Vrbis. Addit. ibidem
Francol. idem Primam ante horam
consuetam speciali lege recitari, ut
Missa secunda in Aurora cantari queat.
Neque enim debet unquam Missa
cantari sine præparatione Chori ad il-
lam per aliquam Horam Canoniam,
ut ibidem auctor idem fusè probat, &
exemplis confirmat. Neque dicas, suf-
ficere Laudes ante Missam secundam;
tum quia non debent diuidi à Noctur-
nis, nisi quantum Missa prima occu-
pat temporis, quod intercedit, cum
sint unica Hora, ut notat Nau. de Orat.
cap. 3. num. 28. tum quia à Laudibus
ad Auroram, in qua secunda Missa can-
tatur, multum adhuc superest tem-
poris, ut nequeat congruenter sequi se-
cunda Missa. Post Tertiam horam
Missa tertia conuenit cantari, ut in
Festis. Nihil est præterea in Officio
notandum, nisi quod Antiphona in
secundis Vesperis, *Tecum principium*,
sunt priuilegia, ut numquam omittan-
tur infra Octauam; & de his
est mentio apud Amalar. de Ordin.
Antiph. cap. 16. ut nimirum fiat de
Octaua Natiuitatis, præter morem
aliarum

De Festis infra Octauam Natiuitatis Domini. 113

iliarum Octuarum de Sanctis, & non per solam commemorationem de eadem; & eò magis, quia intra eamdem Octauam admittuntur quotidie Festa Sanctorum, quæ ab Octauis Epiphaniae, Paschatis, Pentecostes & Corporis Christi vel omnino excluduntur, vel parcè in ijs admittuntur.

De Festis infra Octauam Natiuitatis Domini.

C A P. VI.

Cuius classis erit S. Stephani Festum? Andreas Caftaldus in Cœrim. Cler. Reg. lib. 3. c. 5. num. 1. innuit esse primæ classis. Mihi placet, ut dicatur secundæ classis; tum quia sequens Festum S. Ioannis non est nisi secundæ classis, ut aliorum Apostolorum; tum quia Stephanus & Laurentius in martyrio, Officio, Octaua, sepulchro sunt pares, concordant in tertia Antiphona ad Laudes, & in Oratione duplici, altera in Festo, altera in die Octaua. ex quibus sequitur, quod hæc Sanctorum Festa cederent occurrenti Festo primæ classis. Habent priuilegium non commune alijs Festis secundæ classis, quod de die infra Octauam eorum fit commemoratione in Festis corundem, ut habetur in Breuiario.

2 Antiphonæ Festi huius & duorum sequentium sunt Gallicæ, ex Radulph. Propos. 12. & Lectiones primi Nocturni de sancto Stephano habentur etiam in Ord. Romano. Reliquum Officium tribuitur Alcuino ab Auctore Ligni vita lib. 5. & à Schultingio. Officium S. Ioannis à S. Gregorio compositum afferit Schultingius. Duplia sunt hæc duo Festi apud Dur. lib. 7. Orationes Missarū habentur in Sacrament. Gre-

gorian. Introitus, &c. in Antiphonario eiusdem: vbi & Festi sequentis Missa.

3 In Festo SS. Innocentū non dicitur *Te Deum*, quod lætitiam sonat, quia descenderunt in Limbum, ait Microl. cap. 36. sed non placet, quia Ioannes Baptista item descendit in Limbum, in cuius tamen Decollatione dicitur *Te Deum*: potius ob lacrymas matrū, ait Amalar. lib. 1. cap. 41. In Dominica verò, & in die Octaua dicitur; quia in Dominicalætitia Resurrectionis Domini excellit super omnem lacrymam; & dies Octaua beatitudinem significat, ut alibi diximus.

4 Tertium hoc Festum puto item esse secundæ classis, cui datur Octaua: & de his octauis Amalar. lib. 4. c. 37. meminit. Imò verò in Octaua Innocentum S. Augustinus duos habuit Sermones, ut scribit Possidius. Officium erat Semiduplex, Duran. *suprà*. Pius V. decreuit fieri Duplex. Officium à S. Gregorio, ait Schultingius.

5 Quid agendum, quando Festum ex tribus prædictis erit Patronus loci, seu Titulus Ecclesiæ? Respondeo, in secundis Vesperis Natiuitatis, etiam in Ecclesia propria sancti Stephani, idem fieri quod in vniuersali Ecclesia; quia in pari prima classe maius est Festum Christi quam Stephani, & ideo habet integras Vesperas vtrasque.

6 Inter eadem verò Festa seruentur Rubricæ generales, ut Vesperæ primæ & secundæ sint de digniori Festo, id est, primæ classis, & Patroni, seu Titularis, cum commemor. minus digni; & item de Octaua Natiuitatis, cuius etiam Antiphonæ ad Vesperas semper recitantur, ut serui cedant Domino medietatem Vesperarum, qui venit vergente mundi vespere pro lute

P lute

lute nostra. Ad Laudes vero non sit commemoratio de die infra Octauam aliam, excepta Natiuitatis Octaua, de qua sit semper commemoratio, ut in Rubricis generalibus, & nos supra Sect. 3.

7 Si Titulus Ecclesiae (non Altaris maioris) fuerit Innocentum, erit consequenter prima classis; & eo casu non negarem posse dici *Te Deum* in Officio, & concederem rubrum colorum cum suis consequentijs in Missa: quia, si haec conceduntur ratione Dominicæ, in qua non est dolendum, cur dolemus in Feste Titularis Ecclesiae solemnis? eo prorsus modo quo conceditur in Missa *Credo* S. Ioanni Baptista, si in Dominica venerit, & quando celebratur in propria Ecclesia: quod idem dicitur in Feste S. Laurentij; ergo aequalia sunt, fieri Festum in Dominica, & fieri in propria Ecclesia.

8 Hymni Innocentum de novo fuerunt additi, licet eorum auctor sit antiquus. Vide tit. de *Hymnis* pag. 73.

9 Quæ diximus de praedictis, quando sunt Titulares Ecclesiarum, valent etiam de sequentibus Festis, S. Thomæ Cantuariensis & S. Siluestri: quibus tamen hodie negatur Octaua. In secundis Vesperis S. Siluestri Antiphonæ, *Tecum principium*, non habent amplius locum, terminatae iam in primis Vesperis eiusdem; ergo sumenda erunt de Comm. Conf. Pont. & fit commemoratio Circumcisionis.

10 De Dominica infra Octauam Natiuitatis Rubrica clara est *Quod sit tota Octaua*, ut in quibusdam Ecclesijs vidi, impedita sit Festis Duplicitibus, de eadem fiat commemoratio eo prorsus die, quo vniuersalis Ecclesia facit de eadem Dominica Officium, vel commemorationem. Officium vero Dominicæ, si ea occurrat in Feste

S. Siluestri, non deperit; quia Lectio-nes priuni & secundi Nocturni in praecedenti Sabbato leguntur. Vide cul-tum Dominicæ diei, qui non perit.

11 Occurrit in Urbe N. Dedicatio Ecclesiae Cathedralis in Feste SS. Innocentum; quæ situm est à me, qualiter Officium recitandum erit? Respon-di, ex vi Rubricarum, in primis Ves-peris, post Antiphonas & Psalmos de Natiuitate, Capitulum cum reliquis dici debere de Dedicatione, & cum commemoratione S. Ioannis, cuius Festum est Duplex secunda classis, & Nativitatis Domini, quæ numquam omittitur: de S. Stephano nihil, quia de die infra Octavam nihil sit in Feste primæ classis. In Laudibus & Missa de Dedicatione fit tantum commemo-ratio de Natiuitate. In secundis Ves-peris, Antiphonæ, & Psalmi de Natiuitate, Capitulum, Hymnus, &c. de Dedicatione; commemoratio de sequenti Feste S. Thomæ, vel Dominica, & de Natiuitate, non de diebus infra Octauas SS. Stephani & Ioannis, ex Rubr. de Commemorationibus num. 4. in fine. Non sit Octaua de Dedicatione, quia prohibita est in postrema recognitio-ne Breuiarij. Festum Innocentum regulariter erit celebrandum in die Octaua eorumdem; & quia de iisdem non sit Octaua, poterit dici *Te Deum* cum consequentibus, vna cum vniuersali Ecclesia, & interim non fiet vlla de iisdem commemoratio. Sed eo anno, quo Festum hoc occurrit in Feria 5. celebrabitur in Sabbato sequenti, quod eo casu erit dies infra Octauam Natiuitatis; intra quam sit de Duplice, & præsertim secundæ classis, etiam trans-lato: eo autem anno, quo occurrit in Sabbato, tunc celebriabitur in Feria secunda sequenti; quia de duobus Fe-stis

His translati, Innocentum & S. Thomæ, de digniori prius est recitandum Officiū; & Festum S. Thomæ celebrabitur prima die non impedita post Octauā Epiphaniæ, ex vulgatis Rubricis.

12 Circumcisionis Festum de Christo recens est, ut alibi docuimus Tomo primo. Antiphonæ probant esse de B. Virgine Festum, *O admirabile commercium*; quas commemorat Amalar. lib. 4 cap. 32. Oratio confirmat, *Deus, qui salutis æternae*: de qua Microlog. loco citato. Officium enim Missæ licet habeatur in Antiphonario Gregorij, est tamen posterius S. Gregorio, ut *ibidem* Pamelius probat. In secundis Vespere non fit commemoratione de diebus infra Octauas SS. Ioannis & Innocentium, quia de his non fit Officium die sequenti, ut dicitur in Rubr. de *Commemorat.* 9. num 6.

13 In secundis etiā Vespere Octauæ S. Ioannis concurrentibus cum primis Vespere Octauæ Innocentii, fit tantum commemoratione de Innocentibus, ut integræ Vespere sint de digniori, ex Rubric. de *Concurrentia Officy* 11.n.2.

14 Erant hæ tres Octauæ Semiduplices in Breuiario 1550. edito: Duplices à Pio V. qui addidit omnes Lectiones. Oratio S. Stephani est Ambrosiana.

De Epiphania Domini.

C A P . V I I .

VIglia Epiphaniæ habet Officium Semiduplex, quod nuper expressum est in Breuiario, licet exclusio Precum ad Primam erat sufficiens indicium ritus Semiduplicis. Si occurrat in hac Vigilia Festum Duplex, fit de Vigilia commemoratione tantum, cum nona Lectione de Homilia Vigiliæ: quia Duplici Of-

ficio occurrenti eodem die cedit Semiduplex. De dupli translati non fit in ea, quia est Officium nouem Lectionum, cui etiam Dominica cedit. Si occurrat in ea Festum Semiduplex, transfertur hoc post Octauam Epiphaniæ, eadem de causa; & quia est longè superior quam Feria 6. post Octauam Ascensionis, quippe quæ habet Euangelium proprium, æquiparatur in multis Vigiliæ Nativitatis Domini, ut in Rubr. de *Vigilijs num. 2.* & 5. Quod si fuit concilium Hispanis à Gregorio XIII. posse in hac Vigilia fieri Officium de S. Thoma Cantuariensi, ob Festum translationis S. Iacobii, est singulare priuilegiū, non lex.

2 Antiphonæ, *Ante luciferū genitus*, habetur apud Amalar. de Ord. Antiph. c. 23. Quarta Antiphona, *Maria, flumina*, &c. non visa est aliquibus ad rem præsentem: sed meminerint duorum miraculorum, in aquis Baptismi Christi, & in Cana ad nuptias; de quibus in Hymno, & in Antiphona ad *Magnificat.*

3 Matutinum incipitur ex abrupto ab Antiphona, & Psalmo; quia, visa stella, statim venerunt Magi, muto nuntio, non loquente, Duran. lib. 6. cap. 16. omittitur etiam Inuitatorium, ad detestandam fraudulentam Herodis invitationem ad Christum adorandum, Alcuin. in *Epiph.* tum etiam, quia Psalmus *Venite* dicendus est in tertio Nocturno. Hymnus etiam non cantatur primo die, quia perfectorum est cantare Hymnos; conuersio vero Gentium in solis Magis perfecta non erat, Duran. *ibidem.*

4 Infra Octauam vero dicitur Inuitatorium nomine Magorum alios in uitantium ad adorandum Christum, Dur. *ibidem.*

5 Psalmi apud Alcuianum habentur,

tur, excepto, quod Psal. *Deus noster refugium, & virius*, nunc cantatur in primo Nocturno secundum ordinem Psalterij, qui altis cantabatur in tertio. Vnde & hodie retinet Antiphonam cum *Alleluia*, qui est ritus tertij Nocturni, ut diximus in Natiuitate Domini ^{sup. cap. 5. n. 3.} & usque ad tempora Io. Beleth perseveravit, sed præpostere, ait Alcuinus. restitutus est igitur Nocturno primo secundum ritum Romanum, teste Durando *loco citato*. Item Psalmus *Venite*, qui, ex Gemma lib. 3. cap. 20. cantabatur in fine secundi Nocturni, nunc in principio tertij dicitur, docente Durando, & cum peculiari Antiphonæ repetitione; ad indicandum, quod in tempore gratiae per tertium Nocturnum significato, invitata est Ecclesia de Gentibus per Magos, & stellam: repetita ideo Antiphona saepius, *Venite adoremus*, ut confluant undique omnes. Cantatur autem hic Psalmus vel à duobus Cantoribus, vel melius à quatuor, duabus hinc inde alternatim cantantibus Versus eiusdem, & Choro semper Antiphonam repetente.

6 Infra Octauam pro Psalmo *Venite* alius substituitur, ne idem Psalmus bis dicatur, in Inquitorio, & in tertio Nocturno. Psalmi desumuntur è Ferijs 2. 3. 4. 5. 6. sed plures è Feria sexta, fortasse quia in hac eadem Feria Magi adorauerent Christum, ut innuimus Tomo 1. par. 4. tit. 3. num. 15.

7 Hymnus ad Laudes à Pio V. mutatus; erat enim antiquus, ab Hymno Natalis Domini desumptus, *Enixa puerpera Regem, &c.*

8 De Dominica infra Octauam Epiphaniæ, quando Epiphania occurrit in Dominica, fit in Sabbatho præcedenti diem Octauam. Sed queritur,

cur in ipsam die Octauam, quæ occurrit in Dominica, non fit de Octaua Epiphaniæ cum commemoratione Dominicæ primæ post Epiphaniam? Fieret enim (ut in Duplicibus per annum occurrentibus in Dominica) utriusque satis. Conijcio ego hanc esse causam; scilicet, ne ordine peruerso vita Christi, quæ ab Ecclesia representatur in Officio diuino per totum annum, Christus legatur trigesimum annum agens, antequam repræsentetur duodennis, ætatis, inquam, annorum duodecim: nam, si in die Octaua, quæ habet Euangelium de Baptismo Christi, fieret commemoratione de Dominicæ prima post Epiphaniam, quæ habet Euangelium de Christo duodenne, inter Doctores Dei causam agente, tam in Officio quam in Missa legeretur prius Euangelium de die Octaua, quam de Dominicæ; quod esset inconveniens, & ordo peruersus. Fiat ergo Officium de Dominicæ in Sabbatho, in qua Christus est duodennis; deinde sequenti die fiat de die Octaua, in qua est tricenarius; & ordo seruabitur historicus vita Christi: qui ritus habetur in Breuiario M. S. anni 1300. Perusina Sacristia.

9 Adhuc queritur, & casus accidit, si Patronus loci incidat in Sabbathum, in quo faciendum est Officium de prædicta Dominicæ prima, An Officiū Dominicæ anticipandum erit Feria sexta, quod aliqui scripsere. Ego respondi, non esse anticipandum; quia in Sabbatho sufficit fieri commemorationem de Dominicæ prima cum Homilia pro nona Lectione, argumento à simili, quod, quando Dominicæ 23. post Pentecosten non habet propriam sedem in Dominicæ, neque Feriam in tota præcedenti Hebdomada, in qua possit poni

poni Officium Dominicæ 23. eo casu, in Officio nouem Lectionum in Sabbato fit commemoratio de Dominicæ 23. cum nona Lectione, ut expressè habet Rubrica *de Dominicis num. 4. in fine.* ergo & eodem modo satis est, si fiat hoc loco. In secundis autem Vesperis prædicti Patroni concurrentibus cum die Octaua Epiphaniæ fit commemoratio tantum de die Octaua, vt in Rubr. *de Concurr. Officij num. 2.* Quæ verò dicimus de Patrono, eadem dictio de Titulari Ecclesiæ, vel eiusdem Dedicatione, ex Rubr. 11. num. 7.

10 Lectiones Epistolæ primæ ad Corinthios, ex Decreto Gelasij, ponuntur in Dominicæ ipsa prima post Epiphaniæ, non in Officio Dominicæ, si fiat in Sabbato; quia initia librorum Scripturæ, quoad eius fieri potest, magè cōgruunt diei Dominicæ, quæ est initium Hebdomadæ: & hoc in vsu fuisse, vt à die Nativitatis legatur Apostolus, tradit Ruper. lib. 4. de Divin. Offic. cap. 6.

11 Dies Octaua Epiphaniæ de Baptismo Christi est, Amal. lib. 4. cap. 34. & antiquum Officium de Baptismo erat; nunc autem Euangelium tancum habetur. Semiduplex erat Officium in Breuiario edito Venetijs anno 1521. nunc est Duplex.

12 Quando Epiphania Dominicæ occurrit in Feria tertia, accidit in Sabbatho ad Vesperas, quod pro commemo- ratione Epiphaniæ dicitur Antiphona, *Omnes de Saba venient:* & in hoc casu mutatur Versus, ne eadem Antiphona cum Versu sit idem. Dicitur autem Versus de Laudibus Epiphaniæ, *Adorate Deum,* &c. si occurrit Feria 2. in primis Vesperas dici Octauæ, pro commemoratione Dominicæ dicitur Antiphona, *Fili,* &c. cum *v.* *Omnes de Saba.*

De Dominicis post Octauam Epiphaniæ.

C A P . V I I I .

1 **D**ominicæ post Epiphaniam usque ad Septuagesimam vel ad summum sex, vel ad minimum una esse possunt; & ideo possum est Officium sex Dominicarum. Quod propior est vel remotior Septuagesima, quæ à Paschatis mobilitate pendet, eo plures vel pauciores sunt Dominicæ infra hoc tempus: quæ superfluent, transferuntur post 23. Dominicam post Pentecosten. qua de re nos egimus suprà Sect. 3. cap. 5. pag. 25.

2 De Dominicæ secunda post Epiphaniam semper fit Officium ante Septuagesimam, saltem in Sabbatho præcedente eamdem Septuagesimam; vel in die prima post Octaua Epiphaniæ, Microl. cap. 41. translatu, si opus est, Festo Semiduplici, & hoc duplici de causa; Primo, vt ordine historico seruato de vita Christi, legatur, post eiusdem Baptismum, primum miraculum in Cana Galilææ factum, antequam quidquam aliud in sequentibus Dominicis de eo narretur. Secundo, vt Officium & Responsoria Dominicarum post Epiphaniam semel dicantur suo proprio tempore, nec omittantur omnino. De quibus Responsorijs è Psalmis meminit Amalar. *de Ord. Antiphon. cap. 27.*

3 Dices: In prædicto casu quodnam Semiduplex erit transferendum, vt eo die fiat de Dominicæ secunda post Epiphaniam? Respondeo, in Ecclesia vniuersali Festum S. Hilarij transferendum erit in diem 23. Ianuarij, quidquid alij notarint in Calendarijs, S. Hilario parcentes; quia in

P 3 Ru-

118 Comment. in Rubr. Breuiarij. Sect. VI. Cap. VIII.

Rubrica propria dicitur, *Prima die post Octauam*. Videbatur tamen parcendum S. Hilario, qui in primis Vespere participare solet de proprio die in quo obiit, magis quam S. Paulus Eremita, qui obiit infra Octauam Epiphaniae; sed verba Rubricæ sunt attendenda simpliciter, quæ generatim posita sunt iultioribus de causis, & præsertim ad faciliorem executionem.

4 Quid si Festa omnia per Hebdomadam sint duplia? eo casu erit satis commemorationem fieri Dominicæ 2. in Sabbato; & omittuntur Responsoria de tempore.

5 Si Octaua celebretur in ea Hebdomada, tunc fiat prima die de Feria, quia dies infra Octauam cedit Semiduplici; ergo & à fortiori etiam huic Officio Dominicæ 2. sed omittendæ tamen erunt Preces cum Suffragijs ratione Octauæ.

6 Epistolæ S. Pauli, quæ non possunt legi in primo Nocturno, seu in feriali Officio, infra hoc tempus usque ad Septuagesimam, eo anno omittuntur: quia unus liber omnium Epistolarum S. Pauli tamquam unius auctoris reputatur; & antiquiores non legebant de Epistolis Pauli, nisi usque ad eam quā ille scripsit ad Ephesios inclusuē.

7 Officium Dominicæ 3. vel 4. vel 5. vel 6. si post Epiphaniam minus habeat locum, neque item post Pentecosten; de ea, quæ locum ullibi non habet, fiat Officium in Sabbato, vel in alia Feria præcedenti, non ad libitum, sed impedito Sabbato ob Festum novum Lectionum, & non trium B. Virginis: vel fiat commemoratione saltem in Sabbato, ne prorsus omittatur, ut in Rubr. de Dominicis num. 5. quæ remittit nos ad formam datam in numero quarto ibidem. Quod si in Feria præ-

dicta fiat de Festo Semiduplici translatio, satis erit, quod in Sabbato fiat commemoratione Dominicæ ut suprà, ne translatum Semiduplex sine necessitate adhuc ulterius transferatur, ut decreatum est in postrema recognitione Urbana Breuiarij, nulla enim est necessitas, quando saltem in Dominica 2. dicta sunt Responsoria de tempore.

8 Dominicæ sextæ Officium cum suo Evangelio est de nouo iure Pij V. in qua antiquiores repetebant Officium Dominicæ quintæ post Epiphaniam.

De Septuagesima, & Dominicis sequentibus.

C A P. I X.

1 **D** Eponitur in Septuagesima *Alleluia*, bis eo cantato & repetito in fine primarum Vesperarum Dominicæ, ex Decreto Alexandri II. vi ait Microl. cap. 47. & Baron. ann. 1073. qui ritus in Martyrologio ad Primam pronuntiatur; & deponitur cum reduplicatione, ad maiorem significationem, & emphasis.

2 *Alleluia* significat Christum, sine quo nunc repræsentatur genus humandum, ob peccatum Adæ, de quo fit mentio principalis in Septuagesima, Ruper. lib. 4. cap. 5.

3 Pro *Alleluia* dicimus humiliori Latina Lingua, *Laus tibi Domine*, &c. ex Alcuino: quia temporis congruit humilitas, ob memoriam peccati originalis. A Musicis pro *Alleluia* dicitur *In eternum*, Io. Beleth de Divin. Off. cap. 79. sed à recitantibus Officium omittitur *Alleluia* in Antiphonis, ubi est, & eius loco nihil dicitur.

4 In uitatorium *Præoccupemus* anticipatur in Septuagesima à Pio V. cùm sit

sit eiusdem rationis cum sequentibus Dominicis.

5 Lectiones de Genesi, ex Decreto Gelasij, & Ord. Romano. Responsoria de eadem Genesi recitari iuslit Alexander II. ex Microl. *loco citato*, amotis alijs quæ dicebantur cum *Alleluia*: cùm non deceat (inquit Leo IX. *de Consecr. Distinct. 1. Hi duo.*) cantare *Alleluia*, quando recolimus primi hominis casum in Lectionibus.

6 In Sexagesima dicuntur Responsoria de Historia Noë, ex Decreto Gregorij VII teste Radul. *Propos. 16*, cùm anteā, ex Decreto Alexandri II. repeterentur Responsoria Septuagesimæ. Collecta Sexagesimæ non impedit commemorationem communem de sancto Paulo in Officio. Vide in *To-
mo 1. de Sexag. pag. 235. num. 15.*

7 In Quinquagesima Respons. de Abraham dici iuslit Gregorius VII. ex Radulpho *loco citato*.

8 Datae sunt Antiphonæ propriæ ad *Magnificat* ferè omnibus Ferijs Septuagesimæ, Sexagesimæ & Quinquagesimæ; de quibus antiqui nihil dicunt. Si Antiphonas species, ea propriæ sunt: quia hæ Feriae non sunt ita communes, vt aliae per annum; neque ita propriæ, vt Feriae Aduentus, & Quadragesimæ; quarum Antiphonæ numquam omituntur. Si Ferias attendas, in Feria 6. nulla est Antiphona; quia saltem de S. Maria in Sabbatho fit in Vesperis à Capitulo. In Feria quinta Sexagesimæ, & item sexta in anno bissextili, dicuntur Antiphonæ quæ in præcedentibus Ferijs fuerunt omisæ, si occurrat fieri de Sancto in iisdem; vel certè de Psalterio sumuntur, non autem de Ferijs Septuagesimæ; quarum Antiphonæ, si omittantur ob Festa Sanctorum, non resumuntur.

tur in sequenti Hebdomada: quod perperam scripsere aliqui in Calendarijs Ecclesiarum particularium: neque Rubrica de his Antiphonis posita ante Feriam 5. Sexagesimæ se extendit ultra suam Hebdomadam. Si vero numerum obscuras Antiphonarum, mysterij aliquid fortasse inest: tum quia nouem ea sunt oinnes; tum quia inter eas certus quidam est gradus non nisi congruus (ex Maiorum saltem auctoritate qui eas decreuerunt) vt nimis quatuor Antiphonæ in Vesperris sint assignatae Ferijs Septuagesimæ, tres Ferijs Sexagesimæ, duæ Ferijs Quinquagesimæ.

De Feria quarta Cinerum.

C A P. X.

1 **E**st priuilegiata hec Feria, in qua occurrente quodcumque Duplex transfertur, ex Decreto Clementis VI anno 1352. vt ego legi in Martyrologio M. S. antiquo in Bibliotheca Fortunati Scacchi, sacri Palatij Sacræ, de sacris Litteris opime meriti: & habetur in Breuiario edito Venetijs 1549 quia eo die conuenit, vt populus Christianus pœnitentia publica det indicia.

2 Omnia ergo fiunt ut in Quadragesima, ait Microl. *cap. 49.* & ad omnes Horas, inquit *cap. 50.* genuflectimus, hoc est, dicuntur Preces. Nam, quia nos angere debemus pensum seruitutis nostræ, præsertim in Precibus, ex S. Gregorio relato à Radul. *Propos. 16.* hinc factum est, ex eodem Radul. quod dicantur his diebus feriales Preces cum Officio Psalmorum, Graudalium, & Pœnitentialium.

3 Duæ Orationes dicuntur quotidie in feriali Officio; quarum secunda est

Vespe-

Vesperarum propria; quia in Missa duæ item dicuntur super Populum, altera initio, altera in fine: cuius rei causam dedimus, cùm de Missæ Sacrificio, Tomo priore.

4 Nondum dicuntur Vesperæ ante comedionem, ut reserueretur prærogativa Dominicæ sequenti, quæ est caput Quadragesimæ, cuius primæ Vesperæ dicuntur in Choro ante cœnam; & deinceps idem fit in diebus ferialibus, ex Conc. Cabilonen. *de Consecr. Dift. 1. Solent.*

5 Dixi ante cœnam, quia antiquitus soluebatur ieiunium hora cœnæ in Quadragesima post Vesperas: & licet horam anticipemus, retinemus tamen vocabulum cœnæ, cui benedicimus ea Prece quæ adhibetur ad cœnam, *Edent pauperes, &c.* vt in fine dicitur Breuiarij. Quia vero non possumus ieiunare diebus & noctibus, sicut fecit Christus, ieiunemus saltē usque ad horas diurnales inclusuē, hoc est, dictis Vesperris, ut ait Archid. *in cap. Solent. de Consecrat. cit.*

6 Extra Chorum non tenemur ante comedionem recitare Vesperras, quia Concilium Cabilonense intelligitur de publica in Choro recitatione, cui tamen congruum est ut conformemur in priuata quoque Vesperarum recitatione.

De Dominicis Quadragesimæ.

C A P. XI.

I Nuitatorium Dominicæ primæ, *Non sit vobis vanum, &c.* comp. posuit Amal. ex Wion auctore Ligni vitæ lib. 5. & ille ipse meminit *de Ord. Antiph. cap. 35.* ubi docet tamen se transtulisse hoc Inuitatorium in hanc Dominicam à media Quadragesimæ.

gesima, in qua ab alijs cantabatur. Primæ Lectiones interrumpunt quidem Lectiones de Genesi; sed indicant fructus pœnitentiæ, ex Dur. lib. 6. c. 32, Responoria, ex Amal. *de Ord. Antiph. cap. cit.* sunt claves tituli de conversatione & statu totius Quadragesimæ. Oportet enim hoc tempore corrigere mores, ieiunare, plorare, orare, patientes esse, vigilare, pœnitere, eleemosynam dare, quæ omnia in Responsorijs continentur.

2 Frequentatur Psalmus nonagesimus *Qui habitat, &c.* à quo plures Versus hoc tempore desumuntur: quia, inquit Amal. lib. 4. cap. 19. sumus in his diebus in maiori certamine tentationum; vel inde est, quia male usurpauit hunc Psalmum satanas tentando Christum; contra quem repetimus eumdem in proprio sensu: *Angelis suis mandauit, &c.*

3 Antiphonarum ad Laudes, Cormundum, &c. meminit Amal. *de Ord. Antiph. cap. 36.*

4 Cantabatur in diebus nostris Hymnus *Ad preces nostras* in secundis Vesperris, qui non erat antiquus, & ratione metri scatebat erroribus: tum nullum erat Festum quod quatuor gauderet Hymnis, ad primas Vesperras, Nocturnos, Laudes, & secundas Vesperras, præter Dominicæ Quadragesimæ; & occupatis Ferijs secundis a Festo Duplici (quando Pascha occurrit die 22. Aprilis) eo anno numquam recitabatur. quibus omnibus consideratis, in Recognitione Breuiarij Clementina de Breuiario fuit ademptus. De alijs tribus Hymnis diximus *Sect. 5. cap. 6. pag. 68.*

5 In Feria secunda sequenti adiunt Capitula propria pro omnibus Horis ferialibus Quadragesimæ, de quibus mentio-

mentio est apud Duran. lib. 6. cap. 28.

6 De Quatuor Temporibus nihil fit in Officio. Et de his iam diximus Tomo priore.

7 Dominica secunda cur habeat Euangelium Sabbati præcedentis, habet in Tomo priori. Fortè legitur, quia initio Martij transfiguratus est Christus, si Beletho credimus, *de Diu. Off. cap. 144.* anno Christi vltimo: & in Dominica, hora quarta diei, vt scribit S. Epiph. cit. ab Azor. par. 2. lib. 1. c. 15. quest. 4. Antiphona ad Laudes, *Dominus labia mea, &c.* habentur apud Amalar. *de Ord. Antiph. cap. 38.*

8 Dominica tertia habet easdem Antiphonas ad Laudes, *Fac benigne, &c.* quas recenset idem Amalar. *cap. 40.*

9 In sequenti Feria quinta est Oratio singularis de SS. Colma & Damiano; quia Statio fit in eorum Ecclesia, quā dedicauit Romæ in foro boario Felix IV. ex Rupert. lib. 8. cap. 2. Sed in lib. Sacramentorum S. Gregorij non habetur hæc Collecta; & aliás diximus, à Gregorio II. data esse Officia Ferijs quintis Quadragesimæ. Quis igitur Collectam compositerit, est incertum; cùm in lib. cit. sancti Gregorij I. habeatur Oratio alia cū Secreta & Postcommunione: quarum auctor dicitur Gregorius II. ergo non est Gregoriana, neque Primi, neque Secundi. Non tamen impedit commune Suffragium de ijsdem Sanctis in Ecclesia eorumdem. qua de re in Tomo 1. pag. 236.

De Dominica Passionis.

C A P. X I I.

I N primis Vesperis, etiam si sint de Sancta, teguntur Cruces & imagines; omittuntur Suffragia, seu communes commémorationes

Sanctorum, vt ad Christum hoc tempore sit unicum refugium nostrum; nec de Pace loquimur, quia representatiuè moritur ille, & nondum surrexit, qui deinde dixit, Pax vobis, Duran. lib. 6. cap. 60.

2 Ad Completorium de Tempore, & ad Horas minores (non autem de Sanctis) in Responsorio breui, item in omnibus Responsorijs omittitur *Gloria Patri*, Ordo Romanus; sicut etiam in Inuitatorio, ex Concil. Tolet. can. 15. *Gloria Patri*, inquit Concilium, in fine Responsiorum in latis sequitur, in tristioribus verò reperitur principium: quod idè fit, vt compaginemur humilitati Christi, omitendo excelsa nostra eo tempore quo ipsa Trinitas dehonestatur in persona Christi, ait Alcuinus.

3 In Psalmis tamen nondum tacetur *Gloria Patri*; quia Psalmi, vt diximus suprà, significant opera, & nondum Iudæi operibus, sed linguis tantum, de nece Christi agunt. In triduo verò maioris Hebdomadæ remouetur à Psalmis; quia opere compleuerunt Iudæi necem Christi. Hæc Dur. lib. 6. cap. 60.

4 Ieremias legitur, vt in Ord. Rom. & ex Decreto Gelasij, ob causam allatam suprà Sect. 5. cap. 12. num. 8. pag. 85. De Hymnis diximus eadem Sect. cap. 6.

5 In Feria 2. sequenti habemus eadem Capitula, quæ indicat Duran. cap. 61.

6 In Feria 5. Antiphona ad *Benedictus* & *Magnificat*, contra morem præcedentium Feriarum, discordant ab Euangelio Feriæ. Quare? tum quia de Passione sunt, congruentissimæ temporis; tum quia meminisse debes, Feriam hanc non habuisse proprium Euangelium ante tempora

Q Gre-

122 Comment. in Rubr. Breuiarij. Sect. VI. Cap. XII.

Gregorij II. vt dixi *cap. præced. num. 9.*
Et licet in alijs præcedentibus Ferijs
quintis, addito Euangelio, additæ
quoque sint, remotis alijs, concordan-
tes Antiphonæ; tamen in hac vltima
Feria quinta, addito Euangelio, non
sunt mutatae priores Antiphonæ, vt an-
tiqui ritus vestigium aliquod rema-
neret in hanc vñque diem.

7 In Sabbato Palmarum Euange-
lium legitur, quod historicè contigit
pridie Dominicæ Palmarum: nam ibi
dicitur, *In crastinum autem, &c.* qua
de re scribit Durandus *lib. 6. cap. 66.*
quòd quædam Ecclesiæ hoc idem
Euangelium legebant hac die, non
omnes: nam alia, ex Ruperr. *lib. 5.c.6.*
& eodem Durand. *ibidem,* legebant in
Sabbato, *Ante sex dies Pascha,* & in
Fer. 2. Palmarum, *Cogitauerunt, vt*
Lazarum interficerent. Quem titum
nostrum quis non videat aptiorem
esse ad mysteria quæ celebramus? &
conformior est Breuiario & Missali-
bus M.S. antiquis, & prælo etiam da-
tis ante annum 1550.

8 Quæritur, An in concursu Festi
nouem Lectionum cum Dominicis
Passionis, seu Palmarum in Respon-
sorio breui Completorij omittendus
fit Versus *Gloria Patri:* & quidem
certum est, quòd in concursu Festi
Duplicis non omittitur, ratione cuius
Completorium est festuum, in quo
idcirco non dicuntur Preces. Contro-
uersia fuit de Festo Semiduplici, de
quo tamen diximus *Sett. 5.c. 14. n. 2.*
quòd in secundis Vesperis Dominicæ
Passionis inchoato Festo per comme-
morationem Semiduplicis, ea quæ
sequuntur festiva censentur: at in pri-
mis Vesperis Dominicæ Passionis, seu
Palmarum, Completorium sequens
habet magis de ratione Dominicæ

iam inchoatae in Vesperis, quām de-
ratione Festi iam finiti; & ideo debet
omitti Versus *Gloria Patri.* Neque ob-
stant quæ in ferè simili casu diximus
Sett. 5.c.6.num. 15. quia aliud est mu-
tare formam glorificationis SS. Trini-
tatis in fine Hymni Completorij; qua
in re nihil deperit Officio Dominicæ,
quod eiusdem sit proprium: aliud est
omittere glorificationem eamdem in
Responsorio breui, quod est proprium
Dominicæ Passionis.

*De Dominicæ Palmarum, &
Hebdomada maiore.*

C A P. X I I I .

1 **E**Vangelium Palmarum cum
Homilia in Officio legi, scri-
bit Microl. *cap. 52.* reliqua
concordant cum antiquis. In Capitulo
Nonæ non genuflectitur ad ea, *In no-
mine Iesu, &c.* eadem ratione qua non
genuflectitur in Responsorijs ad ea,
Et Verbum caro, &c. neque in Verbi-
bus Precum fit signum Crucis ad ea,
Deus in adiutorium, &c. Sunt enim
actus proprii, non communes vbiue
iisdem verbis.

2 In Feria 3. & 4. nulla Homilia;
quia in Missa nullum Euangelium, in
qua Passio Christi secundum Mat-
tum & secundum Lucam legitur. De
Ieremia legitur vt in Dominicæ præ-
cedenti; quia de Passione Domini
proprius scribit.

3 Feriæ quintæ discordat Officium
à Missa, quæ est de sanctissimo Sacra-
mento.

4 In Horis Canonis huius tridui
celebramus exequias triduanas mortis
Christi, ait Rupert. *lib. 5. cap. 24.* sine
initio inchoamus Matutinum, Ordo
Rom. & Horas item: & sine fine soli-

to

to imponimus finem; quia Christus moritur, alpha & omega, principium & finis, Ruper. *ibidem cap. 14.* & 25.

5 In uitatorium omittitur, Ordo Roman. in detestationem in uitationis Iudæorum ad conciliabula contra Christum, Alcuin. *cap. In Cœna Domini.*

6 Quindecim candelæ accenduntur in candelabro triangulari, ad fidem de sanctissima Trinitate denotandam, quæ tunc vigebat in B. Virgine, Apostolis, & tribus feminis Mariæ nomine insignitis, ex Io. Beleth *cap. 101.* Numerus autem candelarum erat tunc apud quosdam, quem vniuersalis Ecclesia recepit, vt in Breu. edito Venet. 1550. habetur: antiquiores enim vel non indicant numerum, in Breu. M. S. vel diuersum numerum, in Ord. Rom. 24. candelarum; vel alium numerum in diuersis locis diuersum. lege Io. Belethi *loco citato.* Candelæque debent esse ex cera communi, non alba, ex Cærim. Epis. *lib. 2. cap. 22.* quia color est obscurus; quindecim conformates, *ibidem;* & in Altari sex eiusdem generis ceræ, *ibidem.*

7 Candelabrum triangulare à latere Epistolæ collocandum est, vt in Cærimon. *cit. loco:* quia sinistrum cornu Altaris est, quod in Missa Hebreos significat, ad quos primò venit Christus, Iuo Carnot. *Serm. de Conuenientia noui & veteris Sacrificij.* fuerunt enim Apostoli ex Hebræis: nisi velimus, in sinistro latere portendi sinistros euentus in Christo.

8 Prima Antiphona est, *Zelus domus tuae,* &c. in Ordine Rom. Psalmi verò & Antiphonæ finiuntur cum modica deflexione vocis, ad distinctionem, ex Directorio Chori antiquo; præsertim, quia non dicitur in fine *Gloria Patri*, ob causam allatam

Suprà cap. 12. num. 3. pag. 121. Signum Crucis adhiberi potest ante Antiphonam, *Zelus domus tuae*, vt ante Officium fieri solet ad Vers. *Deus in adiutorium.* Ante omnem actum manus pingat Crucem, ait S. Hier. & his præsertim diebus, quibus Crucis vexillum prodit.

9 Ad vnumquemque Psalmum extinguitur vna candela, Amal. *lib. 4. cap. 22.* vna post aliam; quia Apostoli paulatim defecerunt à Christo, Belethi *cap. 101.* Et primo loco extinguitur ea quæ est ultima in latere Euangelij, Cærim. Epis. *loco citato.* & deinde ab alio latere, & sic successuè, Ordo Rom.

10 In fine Psalmorum cuiuslibet Nocturni dicitur totum secretum *Pater noster;* quia, inquit Durand. *cap. 72.* de Euangeliō est; & Euanglica enuntiatio fugientibus Apostolis cessauit. Christus etiam orauit in Passione australius ab alijs, & valde secreto, idem *ibidem.* Trepidabant Apostoli in precipibus, Gemma *lib. 3. cap. 88.*

11 Neque dicitur, *In te Domne, nec Tu autem Domine,* &c. Ordo Rom. quæ significant, vt alijs docuimus, eentes ad prædicationem, & ab ea redeentes; & hoc loco sic explicat Gemma *loco cit.* vbi etiam addit, non dari benedictionem ante Lectiones, quia Pastor recedit fons omnis benedictionis.

12 Lectiones primi Nocturni sunt de Lamentationibus Ieremiæ, ex Decreto Gelasij *loco suprà cit.* cùm de Lectionibus dicuntur Threni, id est Lamentationes, quæ à Ieremia compositoræ fuerunt post dirutam Ierosolymam, & templum eius exustum, anno mundi 3447. ex Torniello nostro. Threni dicuntur à Beletho c. 101. ob

124 Comment. in Rubr. Breuiarij. Sect. VI. Cap. XIII.

Trenarum montem , vbi animarum lamentationes , quæ illic puniuntur , sæpius audiuntur ; sed penes eum sit fides . Durandus ab eo accepit , & approbat cap. 72.

13 Alphabeto distinguuntur Versus Threnorum , Aleph , Beth , &c. quæ & debent dici à Lectore ; tum ex more Hebræorum , qui Alphabeto vtuntur in Canticis nobilioribus , ut David in Psal. 33. & 118. Salomon Proh. 31. vbi laudat mulierem fortem : tum ex Hieron. in Prologo Bibliorum , quia Versus ipsi in Hebræo codice à characteribus Alphabeti ordine Alphabetico incipiunt ; tum verò etiam , ex Duran. loco citato , ad increpationem Iudæorum , qui rem notissimam , ut Alphabetum , Passionem Christi negant . Fusiūs Durandus .

14 Terminus Lectionum Feriæ 5. usquead Cogitauit Dominus , &c. habetur in Ordine Rom. cum exterminatione , inquit idem Ordo , in fine Lectionis : exterminatio verò est ea , Ierusalem , conuertere , &c. ex Io. Beleth loco citato , quæ cum geminatione fit , Ierusalem , Ierusalem ; exemplo Christi , qui Matb. 23. hac geminatione vsus est , vt notauit Mich. Timoth. in Diu. Offic. quest. 68. tract. 3.

15 Lectiones secundi Nocturni , ex tractatu S. Augustini , Exaudi Deus , habentur in Ord. Romano .

16 Lectiones tertij Nocturni de Apostolo , ex Decr. Gelasij , vti etiam præcedentes , nimirum de Eucharistia , 1. Cor. 11. & Responsoria sunt eadem quæ in antiquis Breuiarijs .

17 Antiphona ad Laudes cum reliquis concordant cum antiquis . Non dicitur Capitulum , sed tantum Versus , Antiphona cum Cantico Euangelico , Pater noster , & Oratio secretæ .

Hæc in Ord. Rom. Psal. Miserere , & Oratio Respice , habentur apud Beleth cap. 102.

18 Versus ille , Christus factus est , &c. erat in vsu in Breuiarijs M.S. antiquis , & in edito anno 1550. cum eadem distributione in tres partes , pro triduo , quam nos hodie adhibemus , & ad omnes Horas . Dicitur semper genibus flexis , etiam ad Horas minores ; & in fine Matutini dicitur cum Psalm. Miserere , & Oratione , si Matutinum separetur à Laudibus .

19 Sed cur Capitulum non dicitur , Versus autem dicuntur ? Respondeat Amalar. lib. 4. c. 21. maiorum munus est cantandi Capitulum , vt diximus supra Sect. 5. cap. 15. num. 4. pag. 92. minorum autem est dicere Versus . Cum igitur hoc Officium sit de Christi humilitate , raceant maiores , audiuntur minores ; & hi quoque minores ex Discipulis (vti sunt mulieres) adhæsere Crucifixo .

20 Psalmus Miserere & Oratio humili voce dicuntur in Breuiarijs M.S. ad designandum Apostolorum timorem , Duran. loco citato ; Oratio quæ dicitur non à stante , vt alias Sacerdote , Amalar. lib. 4. cap. 21 sed genuflexo , ex Cærim. Pap. lib. 2. cap. 42. Cærim. Episc. lib. 2. cap. 22. & ex Breuiario ipso in ijs verbis , & omnes surgunt : ergo non priùs Celebrans surgit , nimirum ad imitandum Christi humilitatis exemplum . Neque salutatione Sacerdotali vtimur , hoc est , Dominus vobiscum , ad detestandam salutationem Iudæ . Amalar. ibidem . vel quia summus Sacerdos moritur , Alcuinus . In fine Horarum huius tridui non dicitur Oratio Dominicæ , nec aliud quidquam ; quia nulla est Rubrica quæ id significet : & , quæ necessariò dicenda sunt ,

sunt , satis apertè describuntur.

21 Fragor denique fit & strepitus, qui significant vel tenebras in Christi morte cum terræmotu ; vel concrepationem Iudæ , & tumultum cohortis, Duran. loco cit.

22 Extinctis præter vnam , quæ est in summitate candelabri , candelis omnibus, ex Alcuino, significatur primò defectus fidei circa 14. articulos à sancto Thoma enumeratos , Duran. loco citato. Quæ ratio à modernis Theologis exploditur , si de Apostolis loquatur : deinde tunc nondum erant 14. articuli fidei. Occultata candela, & rursus ostensa populo , vt fragor cesset, designat Virginem Matrem , in qua super Apostolos fides excelluit ; vel denotat Christum mox rediuiuum futurum in resurrectione , ex Amaral. lib. 4. cap. 22. vel fidem Ecclesiæ eo tempore occultatam , Duran. loco citato. Candelas Altaris extinctas cum alijs , significare docet Prophetarum mortem , & Iudæorum cæcitatem , Rup. lib. 5. cap. 26.

23 Horæ minores recitantur demissa voce, vt in Rubr propria, quæ eadem est cum antiquis, & in Ord.Rom. neque legitur Martyrologium , neque dicitur *Pretiosa* , ratione allata supra Seitz. 5. c. 18. n. 17. pag. 104. cùm de Suffragijs Sanctorum. Vesperæ eædem quæ in Ord. Rom. excepta Oratione. Completorium inchoatur à *Confiteor*, ex vñ communiori , quem firmauimus Rubrica clariori in postrema Breuiarij recognitione.

24 Cur autem hæ demissa voce, quæ sunt Horæ diurnæ , alta voce nocturnæ dicuntur? quia Prophetæ obscurius , sed liberiūs de Christo sunt locuti : Apostoli , qui ad diem Christi, quem vidit Abraham , & gauisus est ,

attinent, in passione eiusdem vix audiabantur, Beleth cap. 102.

25 Lectiones Feriæ sextæ eædem sunt quæ in Ord.Rom. vti etiam Antiphonæ, & Psalmi. de Sabbato nihil occurrit noui. Atque in hoc triduo , ait Alcuin. de Cœna Domini, insinuatur, quod Dominus descendens ad inferos, tria hominum genera rapuit, & transuerxit ad nouem Ordines Angelorum , quos designant tres Nocturni cuiusque Officij , hoc est, vt exponit Amal. lib. 4. cap. 21. qui in agro, molendino , & lecto esse dicuntur, Luca 17. qui sub lumine , & lege naturali, qui sub Moysaica, & qui sub Prophetis : vel, vt exponit Dur. lib. 6. cap. 22. Virgines, Coniugati, Continentes.

26 Vesperæ Sabbati in fine Missæ dicuntur, vt in Missali. Extra Missam qui recitarit, dicat *Pater*, & *Ave*, & sine principio, hoc est, *Deus in adiutorium* (quidquid scribant alij contra Rubricam Breuiarij apertam) quia nondum Caput nostrum rediit in resurrectione, cum Antiph. *Alleluia*, ad modum Duplicis, recitet Psalmum, & quæ sequuntur in Breuiario ; quibus finitis, nihil aliud addatur nisi *Pater noster*, vt hæ Vesperæ (quas non habet propriè hoc Sabbathum ex S. August.) careant adhuc principio & fine, quod est firmatum in postrema Breuiarij recognitione.

27 Confuerunt dīci Vesperæ breuiiores in hoc Sabbato, & vñ cum fine Missæ ; tum , ne Neophyti nondum assueri diuinis Officijs tardio afficerentur ; tum, ne finita Missa per *Itē missa est*, populus recederet sine Vesperis Paschalibus, Beleth cap. 111. quo ferè modo idem scribit cap. 98, finiti Missam cum Vesperis in Parasceue.

Q3 28 Com-

28 Completoriū incipit esse Paschale cum principio, & fine. Antiphona ad *Nunc dimittis* dicitur ad modum ritus Semiduplicis, ut expressè dicitur in Breuiario edito 1550. Quod autem dicitur, ad Antiphonam *Regina Cœli*, &c. standum esse, neque genua flecti toto tempore Paschali; hoc postremum intellige de oratione, non de adoratione, quæ semper fit cum genuflexione, vt ad ea verba patet. *Et incarnatus est*, &c. *Et Verbum caro factum est*: *Tecum quæsumus famulis tuis*, &c. Quare ad Salutationem Angelicam, quæ ter in die sonatur cum campana, ex Decreto Ioannis XXII. vt scribit Polyd. Virgil. lib. 6. cap. 12. seu verius, manè & vesperi, ex Decreto Gregorij IX. an. 1239. vt eodem anno scribit Bzouius: & in meridie abrogatum fortasse usum post Ioannem XXII. restituit Callistus III. an. 1456. ex eodem Bzouio, ibidem. si orationem eam esse putas, stare debes; si adorationem, genua flectere. Ego existimo adorationem esse Incarnationis Verbi diuini: sed quia communior est hodie sensus, & usus, quod ea sit oratio, nec ego genua flecto cum alijs.

29 Quæres: An in hoc triduo ad Horas minores accendantur cerei in Altari. Et in Nocturnis quidem & Laudibus accenduntur; extinguntur autem cùm cantatur *Benedictus*, à Versu illo, *Vt sine timore*. In Feria sexta Horæ ante Missam sine cereis accensis dicuntur, Cærimon. Episcop. lib. 2. cap. 25. In Sabbato idem facendum est ante noui ignis benedictionem. In alijs Horis ante Missam Fer. 5. & ad Vespertas quascumque accendi debent, non ad Completorium, nisi Sabatti sancti.

De Paschate, & eiusdem Octaua.

C A P . X I V .

M Atutinum habetur, vt apud nos, in Ord. Romano, cum tribus Psalmis, totidem Antiphonis, Lectionibus, sine Hymno; quibus ternarijs significantur opera trium dierum, quæ Christus se promisit facturū in præsenti sæculo, *Luc. 13.* hoc est, dæmonia ciicere, sanitates perficere, & consummari tertia die: vel significantur Fides, Spes, & Charitas, quæ in hoc mysterio maximè vigent. Hæc Amalar. lib. 4. cap. 23. Vel dicamus cum Ruper. lib. 8. cap. 2. in nomine S. Trinitatis celebratum esse Baptisma, & ideò tres dici Psalmos; tres autem Lectiones, quia adhuc pauci Prædicatores erant, inquit idem lib. 1. cap. 10. Vel triduanam sepulturam recolimus, ex qua Resurrectio ortum habuit, Duran. lib. 6. cap. 87. Certè antiquum esse hunc ritum testatur, & firmavit Decreto Gregorius VII. *De Consecratione, Distinct. 5. In die.*

2 Non dicitur Hymnus, neque ad alias Horas; quia tempus Paſchale significant statum Beatorum, quorum Hymnus est *Alleluia*, Duran. loco cit.

3 Antiphonæ ad Laudes habentur in Breuiarijs M. S. antiquis. Capitulum non dicitur, neque ad Horas; quia in statu Beatorum non est locus exhortationi, quam alias diximus contineri in Capitulis. Ex quo consequenter non dicitur Responsorium breue, vt notat Durand. loco citato. sunt enim correlativa in Horis minoribus Capitulum, & breve Responsorium; sicut exhortatio, & opus bonum, quæ in illis significantur, vt docuimus Sett. 5. neque sunt comprehen-

hensorum, sed tantum viatorum.

4 Non dicuntur Versus nisi in Nocturno, ob eamdem causam; cum significant excitationem animorum & conuersationem ad Deum. In Nocturno dicitur, quia in nocte timor adest, ait Amalar. *de Ord. Antiph. cap. 52.* & ob facilem noctis somnum, cum Versu fugandus est animorum torpor.

5 *Hac dies* loco prædictorum dicitur: qui Versus desumptus est è Psalmo, cui titulus est *Alleluia*, ut notat Ruper. *lib. 7. cap. 11.* Ordo Romanus eundem Versum habet, & significat lætitiae magnitudinem, ex Rup. *lib. 8. cap. 2.* & quod in statu Beatorum sibi inuicem gaudent & gratulantur, *Gemma lib. 3. cap. 128.*

6 Non dicitur ad Primā Symbolum Athanasij; quia in statu Beatorum non est fides, *Gemma loco cit.* qui status repræsentatur in Christi resurrectione.

7 Vesperæ in Ordine Rom. diuidebantur, ita ut duo ultimi Psalmi, *Laudate pueri*, &c. *In exitu*, cantarentur ad Fontes Baptismales, in quibus baptizati facti sunt pueri, & quasi per mare rubrum transentes exierunt de Aegypto: sed ubi non erant Fontes, cantabantur sine diuisione, *Dur. lib. 6. cap. 89.*

8 Feriæ 2. & 3. sunt Festa maiora, quorum meminit Aug. 22. *Cin. Des. c. 8.* & in his, & in sequentibus diebus eadem dicuntur quæ in die primo; quia, ut alias dictum est, octo dies in Octaua una dies sunt, vnde & dicitur quotidie, *Hac dies*. Ordo Rom. eundem habet ritum præscribens Homiliam singulis diebus; quem restituit Pius V. addens Homiliam Feriæ tertiaræ, in qua paulo ante Pium legebatur Sermo sancti Augustini; & item Feriæ sextæ, in qua Sermo S. Ambrosij legebatur,

De Tempore Paschali.

CAP. XV.

1 N Dominica in Albis resumuntur plures Psalmi & Hymni, ex Ord. Rom. ubi additur etiam causa. Deinde, inquit, in sequenti tempore quasi crescentium arborum frondes multiplicantur Psalmi, & recoluntur mores boni diuersorum operum per plures Psalmos. Idem afferit de nouem Lectionibus in hac Dominica Gemma *lib. 4. cap. 117.* Ad Primam non dicitur Psalmus *Confitemini* more Festorum; quia tempus Paschale totum est festuum, etiam in Officio feriali.

2 In secunda Feria leguntur Actus Apostolorum, ex Decreto Gelasij, & Ordine Romano, indicat August. *in Sermone citato à Demochare Tom. 4. cap. 12.* Scripsit Lucas Romæ eadem Acta anno 61. Neronis quinto, ex Baron. *ad eundem annum.*

3 Psalmi dicuntur hoc tempore, feriales præsertim, sub una Antiphona *Alleluia*, ex Gemma *loci citato*, quia, sicut ex Ordine Romano paulo ante diximus, multiplicantur Psalmi quasi arborum frondes; ita ab una Antiphona, quasi ab una radice, congrue pendunt. Vide *Secl. 5. cap. 7. n. 5. pag. 74.* aliam causam. Ad Laudes ijdem semper Psalmi dicuntur, ex Gemma *loci citato*; & commemoratione de sola Crucifixione in Breuiarijs M. S. antiquis; quia fuit causa lætitiae Paschalis, inquit Azor. *lib. 10. cap. 16.* & quia Christus ipse ad gloriam Crucis Vulnera retinuit, ab ea, vel in ea eidem inficta; quæ passim Apostolis & alijs ostendit his diebus. Oratio vero de Crucis desumpta est à Sacramentario S. Gregorij; sed

sed est Ambrosiana , vt dictum est virtute magna reddiderunt Apostoli Tomo primo.

4 In Dominica secunda post Pascha continuatur Lectione Actuum Apostolorum; quia est exemplaris, cùm antiqui legerent in hac & sequenti Dominica Apocalypsim, vsq; ad annum 1550. & Responsoria congruent Lectionibus, repetita in tribus Hebdomadibus, tamquam propria Resurrectionis eius qui tercia die resurrexit.

5 Dominica tercia legitur Apocalypsis, quam scripsit Ioannes Apostolus in Patmos: ad quam Insulam relegatus fuit à Domitiano anno decimo eius Imperij, & 14. eiusdem eam scripsit, qui fuit annus Christi 97. ex Baronio *eodem anno in Annal.*

6 In Dominica quarta legitur Epistola Iacobi , quam Eusebius lib. 2. Hist. cap. 22. appellat primam earum quæ Catholicæ nominantur; non quod Iacobus ante Petrum scripserit, sed quia in Canone prima collocatur. Obiit ille anno 63. ex Baronio; & facilè eam scripsit, occasione Hæresum Simonis Magi. Responsoria Davidica habentur apud Amal. de Ord. Antiph. cap. 54. Quod si hæc Dominica occurrat die 2. Maij, cùm pridie legi debeat initium Epistolæ Iacobi , ob eiusdem Festum , legantur in hac Dominica Lectiones Feriarum 2. sequentis, ad varietatem , vti decretum est in postrema Breuiarij recognitione.

7 In Dominica quinta legitur Epistola prima S. Petri , scripta anno 45. cùm esset Romæ, quam in fine Epistolæ , more illorum temporum ab Apostolis visitato, Babylonem appellat. Et hæc de Dominicis post Pascha ; in quibus cur legantur Apostolica facta , & scripta præter Gelasij Decretum, addit causam Ruper. lib. 10. cap. vlt. quia

virtute magna reddiderunt Apostoli testimonium Resurrectionis Christi. Orationes à Dominica secunda ad quintam sunt aliae à Missis , quæ habentur in Sacramentario Gregoriano.

De Litanij maioribus & minoribus.

C A P . X V I .

Si occurrant Litaniæ maiores in Paschate , quod accidit anno 1666. & quando littera Dominicalis est C, & Epacta xxv. vel xxiv. vt videre est in Tabula nostra 35. Ordinis perpetui, eo casu transferendæ sunt in Feriam tertiam, ex Decreto S. Rituum Congregationis die 25. Septemb. 1627. cum Processione , in diem quidem Festum , vt populus adsit; non in die Paschatis , né populus impediatur à Communione Paschali; neve tristari videatur vel minimum in tanta solemnitate , colore violaceo adhibito, & Missa cantata de luctu : & consequenter Litaniæ à priuatis in eadem Feria recitandæ erunt.

2 Alias non habebatur in Breuiario Officium de Rogationibus , sed Missa tantum dicebatur: nunc autem Homilia legitur super Euangeliū Missæ & dicitur in Officio Oratio Missæ , quæ habetur in Sacramentario Gregor. De Feria tercia Rogationum nulla fit in Officio de Feste , etiam Simplici, commemoratione.

3 *Qui non intersunt Processionibus dicant priuatim Litanias, &c. quo verbo præcipitur omnibus qui tenentur recitare Horas Canonicas sub mortali, ex Suar. lib. 4. de Hor. Can. cap. 25. num. 8. & 9. Neque de his loquitur Pius V. in Bulla, quando tantum hor-*
tatur

tatur ad Psalmos Pœnitentiales, &c. Et licet oremus stantes tempore Pa-schali; tamen ij qui non intersunt Processionibus, flexis genibus eas recitare debent, *Io. Beleth c. 121.* mœ-rem enim habent cum colore viola-ceo, & recitantes peccatorum potius statum repræsentant quām iustorum, vnde in ijs dicunt, *Peccatores, &c.* De auctoribus Litaniarum maiorum & minorum diximus in primo Tomo.

4 Cœcant ij qui in Processione fa-bulanter, & materialiter tantū can-tant cum alijs Litanias, vel non can-tant, ne rei fiant coram Deo: com-munis enim est opinio, eos teneri ad priuatum earumdem recitationem; quia inter absentes eo modo nume-rantur.

5 An verò in Processione sint can-tanda Litaniae cum repetitione, vt fit in Sabbato sancto. Nonnulli eas can-tant cum repetitione in Litanijis mai-oribus, non in alijs, alij semper cum re-petitione. Standum videtur consuetu-dini locorum, habita ratione quoque longioris aut brevioris viæ: sed repe-titio propria est Sabbati sancti & Pen-tecostes. Si fiat Processio, non antè discedatur ab Altari, quām sit canta-tum inclusuè, *S. Maria, ora pro nobis,* vt dicitur in Rituali Pauli V. In lon-giori Processione vel repitantur, vel addantur Psalmi Pœnitentiales, seu Graduale, *ibid.* terminetur autem cum Precibus & Orationibus, quæ habentur in fine Litaniarum Breuiarij Romani, *ibid.*

6 Quæsitum fuit: An ille qui feci-tat vesperi Matutinum cum Laudibus, possit etiam statim recitare Litanias: & respondi, posse, quia Rubrica con-iungit Litanias cum Laudibus, quibus idcirco adimitur *¶. Fidelium tit. 30.*

de Oratione num. 3. & accessoriis se-quitur naturam sui principalis: quod in hoc casu sunt Laudes.

De Feste Ascensionis Domini.

C A P. X V I I.

1 **V**igilia Ascensionis non ha-bet iejunium, quia de tempo-re Paschali est; vnde & ad-mittit Hymnum *Te Deum*. Habet Homiliam de Euangeli Missæ, de no-uo iure Pij V. vt concordet Officium cum Missa. Microl. cap. 55. meminit ieuniij; ergo post eum cessauit, vel alicubi tantū fuit seruatum.

2 Ascensio Domini indicitur festi-ua cum Antiphonis ad vnumquemque Psalmum, puto ad feruorem cha-ritatis excitandum, quæ in Antiphonis significatur, vt diximus suprà *Sect. 5. c. 7. n. 3.* & in Ordine Rom. leguntur Lectiones primi Nocturni de Acti-bus Apostolorum, quæ à nobis. Amal. de *Ord. Antiph. c. 56.* indicat Officium idem quod nos recitamus. Oratio ha-betur in Sacram. Gregor. Habet Octa-uam, ex Radul. *Propos. 19.*

3 In sequentibus diebus prosequi-mur reliquas Epistolas legere Aposto-lorum Petri, Ioannis, & Iudæ, vs-que ad Pentecosten, ex Decreto Gela-sij. Et binæ Petri, ternæ Ioannis ha-bent rationem vnius libri, sicuti dixi-mus de Epistolis Pauli; vt idcirco ni-hil cures, si earum initia legi non pos-sint, impeditis proprijs Ferijs. quod in postrema Breuiarij recognitione ex-a-minauimus.

4 Scriptit autem Petrus secundam Epistolam anno Christi 68. paulò ante martyrium, vt idemmet significat in Epistola, Baron. eo anno. Sanctus Ioannes scriptit primam, quæ legitur

R in

in Dominica infra Octauam Ascensionis, anno 99. occasione haeresis Basiliensis, qui negabat veritatem carnis in Christo; eodemque anno scripsisse creditur alias duas, quae leguntur in Feria quarta & sexta sequentibus. Iudas autem, ut putat Baronius, scripsit post 2. Petri, anno 68. cum sit eiusdem ferè argumenti; & ultimo loco ponitur, quia in Catalogo Apostolorum erat auctor de postremis: neque insignis ea fuit aestimata, ut Epistola Iacobi, quae ceteris praeposita fuit, ut merito Iude Epistola cesserit locum Epistolis S. Ioannis posterius scriptis, ut diximus, anno 99. Et haec de auctoribus Epistolarum.

5 Octaua Ascensionis erat Semiduplex in Breu. edito Ven. 1521. hodie Duplex: & habet Officium quad Lectiones proprium; alias enim ut in Festo legebatur. Habet primas & secundas integras Vesperas, si concurrant cum Dupli maior, ut in postrema Breuiarij recognitione decreatum est.

6 In Feria sexta & Sabbato sequentibus Officium est de Ascensione, & de Dominica infra Octauam Ascensionis. Sed cur in secundis Vesperis Octauæ Ascensionis non fit commemorationis sequentis Officii Semiduplicis per Antiphonam ad *Magnificat* Dominicæ; sicuti in secundis Vesperis Octauæ Innocentum fit de sequenti Offic. Semiduplici, Vigiliae Epiph. & per Antiphonam Dominicæ infra Octauam Nativitatis? eadem enim videtur esse ratio. Non est tamen eadem: nam concurrente Octaua Innocentum cum sequenti Vigilia, fit cursus inter Festum de Sanctis, & Officium de Domino Sanctorum sub minori ritu; & ideo de Dupli sunt

Vesperæ cum commemoratione sequentis Semiduplicis. At in Octaua Ascensionis cum sequenti Officio non debet esse concurrentia; quia utrumque Officium, licet Duplex alterum, alterum Semiduplex, est tamen de eodem Domino; de quo non conuenit facere Festum, & simul commemorationem, ideo omittitur commemorationis.

7 Si Feria 6. occurrat Festum Semiduplex, in secundis Vesperis fit tantum commemorationis Feriae textæ: & ratio est, quia potius est occurrentia Festi & Feriae, quam concurrentia cum Sabato sequenti; quod neque est Festum Semiduplex, neque dies infra Octauam, sed Officium Semiduplex repetitæ Dominicæ usque ad Nonam inclusiæ. Si occurrat Festum Duplex, fit de eo cum commemoratione Feriae in Laudibus, & secundis Vesperis, sine Lectione Homiliae, cuius Euangeliū in Dominicæ sufficieret fuit lectum. De Festo autem Semiduplici translato fit in hac Feria 6. ut alias in Breuiario Clementis VIII.

8 Dices: Cur in Sabbato, Vigilia Pentecostes, non dicitur in Officio Oratio Missæ, & legitur in eodem Euangeliū Missæ? Respondeo, quod Oratio Missæ ad baptizatos pertinet, ut patet ex eiusdem verbis; & hi baptizantur cantata Nona, & finito Officio.

9 Ad Primam in his duobus diebus, licet sint Officia Semiduplicia, & extra Octauam, omittuntur tamen Preces, de iure nouo Clementis VIII. quod tamen erat in usu in Breu. edito 1550.

10 Per decem vero dies fit Officium de Ascensione, Amal. de Ord. Antiph. c. 54. quia per obseruantiam Decalogi acceperant Apostoli Spiritum sanctum in Pentecoste, Duran.

lib.

lib. 6. cap. 105. Oratio Dominicæ alia est ab Oratione Missæ, quæ habetur in Sacramentario Greg.

De Pentecoste.

C A P . X V I I I .

Habet in Matutino tres Psalmos cum totidem Lectionibus, ut in Paschate, Ordo Romanus, & ex Greg. VII. de *Consecrat. Dist. 5. cap. In die.* vbi assertur fieri de antiquo more, quamvis apud Romanos fuisse suo tempore Festum nouem Lectionum scribat Amalarius Gregorio longè antiquior in *Prologo de Ord. Antiph.* contra Ordinem Romanum Amalario antiquorem.

2 Restitutus est ergo ritus à Gregorio VII. vel firmatus Decreto: quo ritu idem significatur, quod diximus supra in Paschate *cap. 14. num. 1.* exceptis proprijs causis ad resurrectionem pertinentibus. Antiphonas, quæ in hac die dicuntur in Nocturno, recenset Amalar. *lib. 4. de Diu. Offic. cap. 27.* ut demonstretur, inquit, unum opus esse in potentia miraculorum S. Trinitatis, tum in resurrectione Filij, tum in aduentu Spiritus sancti. Tres Psalmos dici ob Baptismum, qui datur in Pentecoste in nomine Trinitatis, tradit Gemma *lib. 3. cap. 144.* Antiphonarum ad Laudes, quæ apud nos, meminit Amal. *de Ord. Antiph. cap. 57.* Antiphona quarta non videtur aliquibus congruere Festo: sed recolant, quod in Genesi dicitur, *Spiritus Domini ferebatur super aquas.* De Hymnis, & eorum fine, vide sup. *Secl. 5. cap. 6. num. 5. &c. 12. pag. 67. 72.*

3 Ad horam Tertiam dicitur Hymnus *Veni Creator;* quia hora Tertia

super Apostolos Paracletus descendit. Et licet quotidie ad eamdem Horam inuocemus eundem Spiritum, *Nunc sancte nobis Spiritus;* tamen conuenit hac die, ut Hymno longiori & proprio Festi eum inuocemus, & ad nos inuitemus.

4 Per Octauam leguntur Euangeliæ cum Homilijs, quæ apud Duran. habentur *lib. 6. a cap. 110.* & deinceps: nam tempore Ruperti alia legebantur in Quatuor Temporibus Pentecostes, ut ipse scribit *lib. 10. cap. 27.*

5 De Feria quarta, sexta & Sabbatho Quatuor Temporum, quæ sunt Tempora aestiva, diximus Tomo priore. In his autem ad Horas non fletimus genua, ex Ord. Rom. quia tempus adhuc Paschale est; & ideo dicitur etiam *Te Deum.*

De Dominica Trinitatis.

C A P . X I X .

Præter ea, quæ diximus Tom. 1. par. 4. tit. 12. pag. 280. de origine Festi sanctissimæ Trinitatis, inuenies apud S. Augustinū Tom. 10. nonnullos Sermones in eodem Festo habitos, seu, quod puto verius, eidem Festo à Collectoribus assignatos: nam in ijs ne verbum quidem habetur, quo Festum hoc tunc temporis indicetur. Atqui post Alexandrum III. in Romana Ecclesia decretum est hoc Festum, *cap. Quoniam. de Ferijs.*

1 Officium, quod hodie recitatur, antiquum appellatur in Breuiario edito Venetijs 1550. & puto esse illud, quod à sancto Stephano Leodiensi compositum fuisse scribunt Duran. l. 6. c. 114. & Trithemius in *Chron. Hirsa- gieni.* Aliud Officium ego legi à Romana Ecclesia usurpatū, à Io. Pechano

R 2 At-

Archiepiscopo Cantuar. compositum, à Francisco Titelmanno expositum: quod fuit in vſu circa annum 1290. quo viuebat Pechanus: sed quia stylus est difficultior, & obscurissimus, eo abrogato, illud est sufficetum denuo, quo nos vtiimur; in quo tamen Pius V. mutauit Hymnos & Lectiones; addidit primum & ultimum Responoriū, media aliqua mutauit in meliora; ad Laudes autem iussit repeti Antiphonas in primis Vesperis positas, reliqua non sunt mutata. Oratio habetur in Sacramentario S. Gregorij, in *Missa de nocte Pentecostes, editionis Romanae*. Fit commemorat. Dominicæ primæ Pentecostes, ne omittatur Dominicæ, cuius Oratio est Ambrosiana. In secundis Vesperis, si concurrent cum Feito primæ classis, fit de sequenti, cum commemoratione Trinitatis tantum: si cum Feito secundæ classis, integræ Vesperæ erunt de Trinitate, ex Rub. de *Concurrent. num. 2.* quæ Vesperas integras assignat maiori Festo, & commemorationem minori. Ipsamet Trinitas sic voluit, à qua regitur Ecclesia; quidquid contraria scriperit Petrus Ruiz. Et hæc Dominica prima post Pentecosten ut sic, est eiusdem rationis cum Dominicis sequentibus: non enim de ea intelligitur Rubrica sub titulo Dominicarum primæ classis, quæ numquam omittuntur, nempe Dominicæ Trinitatis: & patet, quia de illis fit totum Officium, de hac vero commemoratione tantum: & ipsa commemoratione omittitur in secundis Vesperis, si Feria secunda celebretur Festum secundæ classis, vel primæ. Neque mireris, quod Festum Trinitatis nunc dicatur Festum, nunc Dominicæ; nam utrumque verum est: & ratione Dominicæ, in qua semper occur-

rit, habet hoc, quod numquam omittitur Officium de Trinitate, licet eodem occurrat alicubi primæ classis Festum; ratione vero Festi habet ea tantum quæ sunt propria Festorum secundæ classis, puta commem. de Simplici in Laudibus tantum, & in Missis priuatis. Neque in Rubricis potuit congruè aliter fieri ad utrumque decernendum, quidquid obiecerint non pauci.

2 Octauam in Octauario nostro descriptam arguunt aliqui; quia Microl. non laudat Festum: sed aliud est loqui de Ecclesia vniuersali, in qua quilibet Dominica Trinitati erat dictata; aliud est loqui de Titulo Ecclesia particularis. & in hoc sensu sacra Rituum Congregatio decrevit Octauam sanctissimæ Trinitatis, & dignorem in propria Ecclesia esse quam Octauam Corporis Christi. An vero infra Octauam dicatur Symbolum S. Athanasij, vide supra *Sect. 5. c. 20. num. 4. pag. 101.*

3 In tertia Antiphona ad Laudes, vox *omnium coniungenda* est cum *ore*, non autem cum *Patri*, ita, ut dicas, *in ore omnium*.

4 In Feria secunda sequenti, cum pridie non potuerit legi ob Festum Trinitatis, legitur primus liber Regum, Microl. *cap. 59.* & Gemma lib. 4. c. 117. quem librum à Samuele fuisse compositum, testatur liber 1. Paralipom. *cap. vlt. 1.* hoc est, usque ad cap. 24. nam in sequenti narratur eiusdem obitus. Dauidem suppleuisse ait Isid. lib. 6. *Originum cap. 2.* quem sequuntur alii: Nathanum, & Gadum alii, ex cap. vlt. 1. Paralipom. Ieremiam potius Torniellus noster existimat probabilius, *sub anno mundi 2977. num. 2.* Res est incerta.

Leg.

Legitur autem de libris Regum, ex Decreto Gelasij, ut diximus *Sect. 5. cap. 12. num. 8. pag. 85.*

De Festo Corporis Christi.

C A P. X X.

Officium scripsit sanctus Thomas. & habetur in *Opus. 57.* iuxta ritum illorum temporum. Hodie concordamus cum auctore, seruato ritu Pij V. in Officio toto, his exceptis. Capitulum in primis Vesperis erat aliud. Lectiones primi Nocturni erant de Scriptura veteri: amoto quarto Responsorio S. Thomae, additum est sextum de novo, Pij V. iussu.

2 Per Octauam non mutatur amplius Inuitatorium, neque Antiphonæ ad *Benedictus* & *Magnificat*. Lectiones quoque pro tribus Nocturnis additæ sunt à Pio V. in quibus apparent congruentiae cum mysterio, etiam in primis Lectionibus, quæ de Arca Testamenti, Eucharistiae figura, narrationem continent.

3 De Priuilegijs huius Octauæ, si concurrat cum Festo, & Octaua sancti Ioannis Baptista, & qua ratione excludat Semiduplicia Festa, & Duplicita translata, diximus *Sect. 3. cap. de Octauis.*

4 De Simplici fit tantum commemoratione infra hanc Octauam. An nona Lectio erit legenda? Negant aliqui, quia hoc non dicitur in propria Rubrica; quod tamen dictum fuit in Rubrica posita infra Octauam Ascensionis: sed una Rubrica explicat aliam, prior posteriorem. & patet debere legi, ex Rubr. gen. de Commemor. 9. num. 10.

5 Indulgentiae concessæ ijs qui in-

tersunt Horis Canonicas in Festo, & per Octauam, valent, etiam si Officium dicatur de Sanctis occurrentibus, ex Decreto Ioannis XXII. quod ego legi in antiquo M. S.

De Dominicis post Pentecosten.

C A P. X X I.

Non minorem viginti tribus, nec maiorem viginti octo Dominicarum numerum post Pentecosten fore usque ad Aduentum, satis superque patet; quæ supplentur cum Dominicis quæ superlunt post Epiphaniam, ut docuimus *Sect. 3. c. 5. de Dominicis pag. 25.* Ponuntur autem in Breuiario Dominicæ viginti quatuor cum proprijs Orationibus & Euangelijs, quæ fuerunt optimè per Dominicas distributa; Orationes quidem à sancto Gregorio, Euangelia vero à sancto Hieronymo: quorum auctoritas sufficiat pro ratione, cur potius hæc vel illa Oratio; cur hoc vel illud Euangelium legatur; & hac vel illa Dominicæ. Idem ferè, paucissimis mutatis, tum textus, tum ordo Euangeliorum hodie perseverat à sancto Hieronymo præscriptus, ut vidimus in eius Comite, seu Lectionario: in primis autem Dominicis post Pentecosten apud minus antiquos erat alius ordo, vel mutata sedes aliquando Dominicæ pro diuersarum Ecclesiarum usu; quod videre est in Ruper. 100 lib. 12. de Divinis Offic. in Gemma lib. 4. 100, & in Durando lib. 6. 100. Orationes item, quæ mox sequuntur, Ambrosianæ sunt, & à sancto Gregorio aliter distributæ, nimisrum, Dominicæ quintæ, nonæ, & vigesimali prime, reliqua Romanae.

R 3

2 Tem-

2 Tempus autem hoc totum à Pentecoste ad Aduentum, ex Amal. de Ord. Antiph. cap. 58. insinuat humilitatem illam; quam solet sustinere Ecclesia propter absentiam Christi sui Sponsi.

3 De ordine, quo legitur Scriptura sacra hoc tempore, & quam ob causam, scripsimus supra Sect. 5. cap. 12. num. 8. pag. 84.

4 Et quidem usque ad Augustum legimus libros Regum, quorum secundum scripsit vel Nathan, vel Gad, vel Ieremias; tertium & quartum Ieremias, ex Gemma lib. 4. cap. 117. qui hausit ab Isid. lib. 1. de Diuin. Offic. cap. 12. & est opinio constantior.

5 Mense Augusto leguntur Sapientiales libri; inter quos Cantica cantorum infra Octanam B. Virginis Assumptæ, in eiusdem laudem: & quidem Proverbiorum, Ecclesiastæ, Cantici cant. est sine dubio Salomon auctor; Sapientia vero libri facit auctorem eundem Salomonem Isid. loco citato, Philonem S. Hieronymus. qui conciliantur à Bellarim. de Scriptoribus Ecclesiasticis, quod sententiae Salomonis sunt; earum collector Philo, qui Græcè scripsit, antiquior alio Philone, qui sub Caio Imperatore floruit. Ecclesiasticus quoque legitur per duas Hebdomadas, nisi dematur altera, ob breuitatem temporis, appropinquante Septembri: quem librum scripsit Iesu filius Sirach, nepos Iesu Sacerdos, cuius meminit Zacharias, ut tradit Isid. de Diuin. Offic. loco citato.

6 Mense Septembri legitur primo Iob: cuius historia vel ab ipsomet, vel à Moysè, vel ab aliquo ex Prophetis scripta est, ex Isid. lib. 6. Originum c. 2. Bellarminus loco citato putat à Iob fuisse adnotatas res à se gestas lingua

Arabica, & à Moysè deinde ex ijs compositum fuisse librum, quem nunc habemus lingua Hebraica; tum quia Hebrei hoc idem asserunt esse opus Moysis; tum quia dicitur Moyses primus sacrarum Litterarum scriptor, qui fuit tamen longè posterior Iobo, & hac ratione in Canonem Scripturarum ab Hebreis admissus fuit hic liber legitur autem per duas Hebdomadas Septembres.

7 Legitur præterea Tobias in tercia Hebdomada, cuius Historia auctor vel fuit Tobias senior, vel junior, ait Bellarm. Incertum esse auctorem, scribit Isid. de Diuin. Offic. loco citato. Sed parum de eo legitur, propter Ferias Quatuor Temporum, de quibus in priore Tomo diximus; & in Officio earum Feriali nihil occurrit specialiter notandum.

8 Circa finem Septembres in Hebdomada quarta & quinta legitur Iudith cum Esther; libri vero Iudith fuit auctor incertus, ex Isid. loco citato, Bellarminus ex Josephi historialib. 1. contra Appionem, Sacerdoti Eliachim tribuit, qui & Ioaichim. de quo cap. 4. & 15. Iudith. Achiorem vult esse auctorem Gemma lib. 4. cap. 117. Esther historia ab Esdra scripta fuit, ex Isid. lib. 6. Originum c. 2. sed Bellarmino magis placet, quod fuerit auctor Mardochæus. Lege Torniellum nostrum anno 3650. num. 3. & Gemmam loco citato.

9 Mense Octobri leguntur libri Machabæorum: quorum primus habet auctorem incertum, ex Isid. lib. 1. de Diuin. Offic. c. 12. Probabile videtur Bellarmino, fuisse scriptum à Ioanne filio Simonis; sed Gemma loco cit. docet, Simonem scripsisse prima capita, posteriora Ioannem. Secundum vero librum

librum scripsit Philo Iudaeus, ex Gemma *loco citato*, vel Iudaeus agrestis, sed eruditus, vtrat Duran. lib. 6. cap. 130. vel certius, Iason Cirenæus, vt *loco cit.* docet Bellarminus.

10 Mense Nouembri legitur primò Ezechiel per duas Hebdomadas, nisi Aduentus præproperè occupet Novuembrem, cuius reuelationes, sicuti & Danielis, & 12 minorum Prophetatum Synagogæ sapientes viri collegere, ex Isid. lib. 1. de Dis. Off. cap. 12. Auctores tamen ijdem dicendi sunt qui prophetauerunt. Maiores dicti sunt Prophetæ, Isaías, Ieremias, Ezechiel, Daniel, minores alij duodecim, rum ex August. 18. Ciu. Dei cap. 29. quia prolixiora Volumina illi scripserunt, hi Sermones breues; tum ex Bellarm. quia minorum Prophetatum libri omnes vnicō libro comprehenduntur apud Hebræos; illi singulos edidere libros. Ordinem autem temporum, quo scripserunt, habes suprà Sect. 5. cap. 12. num. 7. pag. 84.

11 In gratiam martyrij septem Machabæorum, si forte desit Dominica quinta Octobris, iubemur legere de eo Fer. 5. præcedente dictam Dominicam; & eodem modo, si Dominica quinta & Feria sequentes fuerint impeditæ, quo minus de Scriptura legi possit, leguntur in alijs sequentibus Ferijs post Feriam tertiam, ita ut saltem inchoentur, si minus omnes de eorumdem martyrio possunt legi Lectiones. Nulla enim est obligatio legendi totam historiam de martyrio septem Machabæorum, vt ex Rubrica patet in Breuiari. posita ante Fer. 5. Hebdom. 4. Octobris: ex qua vel leguntur in Feria 5. 6. & Sabbato Domin. 4. vel ijs impeditis, omittuntur quæ legi non possunt: vel in sua propria Hebdoma-

da quinta leguntur in suis proprijs Ferijs, vel in sequentibus 4. vel 5. vel 6. vel Sabbato, iuxta ordinem historiæ; numquam verò ultra tres Lectiones in qualibet Feria, ne grauetur Clerus. & fuit hoc sancitum, me præsente, in Recognitione Breuiarij sub Clemente VIII. Qui verò voluerit uno eodemque die eas omnes nouem vna simul legere, impeditis alijs diebus, legat arbitratu suo; sicuti quilibet etiam legere potest integrum totum textum trium Lectionum pro initio cuiusque Prophetarum, & Lectione vna: at in Calendarijs Ecclesiarum sat is est imponere necessarium onus Lectionum, non autem arbitrarium, quod & nos præstitimus in Ordine nostro diuini Officij perpetuo in Tabulis eiusdem. Habent autem SS. Machabæi Festum proprium 1. die Augusti, quod omissionem harum Lectionum supplere videtur.

12 Initia Lectionum minorum 12. Prophetarum legi debent, licet dixerimus apud Hebræos constituere vnum librum; quia plures nihilominus sunt auctores, vt in Rubrica de Lectionibus dicitur num. 7. ita vt, inquit, aliquò modo ponatur initium Prophetæ vel in sequenti, vel in præcedenti Feria non impedita simili initio Scripturæ ponendo, vel plura simul initia uno die, vt diximus suprà Sectione 5. c. 12. num. 12. pag. 86.

13 Quid si, verbi gratia, Festum S. Catharinæ sit Duplex primæ classis in sua Ecclesia, in quo legi idem debent Lectiones primi Nocturni de Communi Virginum; neque dies amplius vacet ad legenda reliqua initia Prophetarum? sàpè accidit in longiori Aduento; & tunc omitti possunt quæ locum non habent: nam Rubrica citata

citata num. 7. ait, *quoad commode fieri poterit*; parumque refert, si in Ecclesia aliqua particulari non legatur de omnibus Prophetis aliquo anno.

14 Lectiones autem secundi Nocturni in prædictis Dominicis concordant cum Lectionibus primi Nocturni, ita, ut sint quasi earumdem Commentaria, excepta Domin. 3. Septembris, in qua sanctus Leo nos invitat ad ieunium septimi mensis, & Dom. 5. Nouembrit, in qua sanctus Basilius timorem Domini docet; eò quod ea Dominica ultima post Pente-

costen, in Euangelio de fine mundi & de iudicio vniuersali agitur.

15 Responsoria denique Lectionibus respondent, ut nihil magis: sicut etiam Antiphonæ ad *Magnificat* in primis Vesperis Dominicæ desumuntur è Scriptura legenda in primo Nocturno Dominicæ eiusdem; ad *Benedictus*, & *Magnificat*, in secundis Vespetris, ex Euangelio eiusdem Dominicæ lecto in Nocturno tertio, ita, ut ipsæmet Antiphonæ sint de veteri vel nouo Testamento. Atque hæc de Proprio de Tempore.

SECTIO SEPTIMA.

De Proprio Sanctorum.

SECTIONIS SEPTIMÆ CAPITA XIII.

- 1 De Vigilijs, Festis & Octauis Sanctorum.
- 2 De Festis Sanctorum mense Decembri.
- 3 De Festis Sanctorum mense Ianuario.
- 4 De Festis Sanctorum mense Februario.
- 5 De Festis Sanctorum mense Martio.
- 6 De Festis Sanctorum mense Aprili.

De Vigilijs, Festis & Octauis Sanctorum.

- CAPUT I.
- 1 **D**e his vide in primo Tomo, & in Præfatione ad Octuarium Romanum.
 - 2 Historias singulorum Sanctorum, de quibus in Breuiario fit Officium,

- 7 De Festis Sanctorum mense Maio.
- 8 De Festis Sanctorum mense Iunio.
- 9 De Festis Sanctorum mense Iulio.
- 10 De Festis Sanctorum mense Agusto.
- 11 De Festis Sanctorum mense Septembri.
- 12 De Festis Sanctorum mense Octobri.
- 13 De Festis Sanctorum mense Novembri.

non est huius loci recensere; aliorum est prouincia, non nostra.

3 Quare hoc loco tantum est dicendum: Primò, quandonam cuique Sancto, de quo fit Officium, fuit assignata sedes in Calendario Romano; seu, quod idem est, in Breuiario. Secundum autem intellige eum diem quo quisque descriptus est in Calendario Roma-